



Wantok

K1 tasol

Sekim nem bilong ol Yuni studen insait.. 16Pes...

Namba 2106 Januəri 22 -28, 2015 32pes

Niuspepa Bilong Yumi Ol PNG Stret!

UNLIMITED FREE CALLS
Bundled with SMS and Data.

Dial *123*15# to subscribe now!
Valid for 14 days.

30 mins Voice + 30 MB Data + 30 SMS

Pay only **K15**

Unlimited Free Calls (Between Limited Vodafone Numbers)

30 mins Voice + 30 MB Data + 30 SMS


For more information contact us now
Customer Care 1800-888888

bmoblie | vodafone
Power to you!

Sekim Today Neks Wik

INSAIT

Ol papagraun long Aropa amamas long balus sevis **P5**



Tafeto helt senta i gat nupela em-bulens - **P6**



Bisnis meri winim CPL Ka pro-mosen - **P7**



No ken baim projek fi: Minista

- K305m bilong ol skul neks wik
- SBE stat long 2015

Stanley Nondol i raitim

MINISTA bilong edukesen, Nick Kuman i tok save long olgeta papamama long kantri olsem edukesen bilong pikinini em fri. Na em i tok lukaut i go long olgeta skul long kantri long i no ken sasim projek fi. Mista Kuman i tok sapos wanpela skul i sasim projek fi bai dipatmen i holim bek fri edukesen mani bilong ol.

Minista Kuman i tok gavman i putim bikpela milien kina long fri edukesen na rausim skul fi hevi long ol papamama olsem na ol skul i no ken sasim projek fi long laik bilong ol na givim hevi long ol papamama. Em i tok i gat inap mani na gavman i redi long givim long olgeta skul long neks wik.

Mista Kuman i givim strongpela tok lukaut olsem sapos wanpela skul i sasim projek fi long ol sumatin bai dispela skul i no inap kisim fri edukesen mani bilong dispela yia na ol bos bilong dipatmen bai mekim save long het tisa na bot bilong skul.

Mista Kuman i mekim dispela toktok long dispela wik taim em wantaim Seketeri bilong Edukesen, Dokta Michael Tapo na ol senia opisa bilong dipatmen i bungim ol niulain long wanpela midia konprens long tok klia long sampela toktok bilong edukesen we i bin kamap long nius.

Ol sampela tok klia ol i mekim em:
- Edukesen dipatmen bai givim namba wan hap bilong fri edukesen mani long mak bilong K305 milien i go long ol skul long neks wik. Seketeri Tapo i tok 10, 060 skul i redi na mani bai go stret long akaun bilong skul bikos akaun bilong ol i op na redi.

I go moa long pes 2...

Pundaun kam daun long bikpela bilding...



Poto hia i soim ol wokman bilong wanpela konstraksen kampani i traिम long helpim wokporo bilong ol husat i pundaun i kam daun long bikpela bilding ol i wok long en long Waigani...Man hia i kisim bikpela bagarap na slip long haus sik nau. Lukim moa stori long pes 2. Poto: Joylyne Karato, sumatin bilong UPNG

READY. SET. SCHOOL

TISA School Fee Loans **1%** INTEREST RATE PER MONTH

Here's just what you need to put a **SMILE** on your face. [Apply Now!](#)

300 2200
marketing@tisl.org.pg
www.tisl.org.pg

TISA
Not for Profit, Not for Charity, But for Service

Wokman kisim bikpela bagarap

Joylyne Karato UPNG sumatin i raitim

WANPELA wokman bilong wanpela konstraksen kampani i pundaun long wanpela longpela bilong long Waigani na kisim bikpela bagarap long Mande.

Ol i tok tupela man i pundaun long wankain taim na kisim bagarap tasol wanpela i kisim liklik hevi na narapela husat i

stap antap stret i painim bikpela hevi.

Man husat i kisim liklik hevi i stap long namba 5 flo we narapela bungim bikpela hevi i stap long ten flo i na kisim bagarap.

Wanpela wanwok bilong ol husat i no laik givim nem i tok olsem em i lans taim na em i no kaikai gut na i laik apim wanpela ain ba na em i pundaun.

Ol i ringim embulens long

kam kisim dispela man tasol em i no hariap bikos trefik i longpela stret.

Ol i putim em long konstraksen bas na kisim em i go long emejensi long Paradais Intenesenel Haus Sik (PIH).

Ol wokman tu i komplem olsem ol i save wok long bikpela kampani tasol ol i no save kisim ol stongpela kaikai long lans long givim ol stong long wokim kain ol bikpela wok.

PNG LNG Projek i pinisim LOC tes bilong em

Insait long bikpela siti bilong Papua Niugini long Pot Mosbi, 120 de operesenel tes bilong PNG LNG i kamap long mak bilong em.

Dispela tes i wankain olsem ol narapela we em i ken kisim

helpim i go long fainensel komplisen tes ol i putim long ol i ken lukim na tok orait long projek long sait bilong mani.

Bihain long ol i kisim dispela ripot bilong fainens, ol bai tok orait long givim garenti pepa,

bekim ol dinao na ol bai stat long skelim wok.

Long sapotim dispela projek long mani bai ol konsotium benk na sampela ol eksport kredit ejensi bai wok bung wan-taim na helpim.

Woks Dipatmen i tokaut long 2015 wok plen

Joylyne Karato UPNG sumatin i raitim

DIPATMEN bilong Woks i tokaut olsem ol i redi pinis long karimaut plen bilong mekim wok olsem stretim rot na bris long mani baset mak olsem K240 bilien nesenel gavman i givim ol.

Long taim ol i tokaut long dispela plen, Minista bilong Woks na Implimentesen, Belly Kelly Kaio i tok olsem long dispela yia, ol bai lukluk long mekim wok long stretim Hailans Haiwe i stat long Lae i go antap long Hela na Enga.

Em i tok i gat planti gutpela samting olsem risos i stap long ol Hailans provins we ol

nidim gutpela rot.

Bikpela mani bilong gavman i go long stretim kain hevi bilong rot tasol i gat planti asua i stap long kisim sevis i go long taim ol i pinisim tu, rot ol i mekim bai i no stap longpela taim.

“Dispela kain hevi i save kamap taim i gat liklik asua i stap wan-taim ol papa graun na ol wokman we ol i save askim long mani long baim graun na tu, taim ol kontrakta husat i wokim wok i no gat gutpela plen bilong mekim wok.” Mista Belly i tok.

Em i tok ol Kontrakta i mas gat olgeta samting i stap redi long wokim bisnis. Ol i mas redi gut bipo ol i kisim dispela ol

rot projek na i no long yusim ol dispela gavman mani long baim masin na ol bekho long statim kontrak.

Long wankain taim Minista bilong Woks Fransis Awesa i tok olsem long dispela yia ol bai i no inap givim kontak long ol wantok.

“Wantok bisnis em i pinis nau. Planti mani inap long wokim gutpela rot i go long ol Kontakta na rot ol i mekim i no sais bilong mani mak mipela i givim ol.” Awesa i tok.

Ol kontrakta i no ken stilim mani bilong pablik long stretim rot na olgeta taim, ol i mas wok hat long pinisim wok bilong ol long taim na i no askim long mani tumas.

Mobail fon kampani stretim gen fon sas

Yakam Kelo i raitim

MOBAIL fon kampani, Digicel i givim bek K1.5 milen fri minit taim bilong toktok bihain long memba bilong Bulolo Sam Basil na pablik i komplem olsem ol i lusim mani long voismeil kol. Dispela em ol kol we no gat man i bekim na voismail nating i kamap na kaikai ol yunits (mani) long fon.

Pangu Pati lida na Deputi Oposisen lida Sam Basil i bin askim opis bilong Independen Kompetetisen na Konsumas Komisin (ICCC) long sekim ol fi dispela mobail fon kampani wok long

sasim long ol kastoma long Papua Niugini.

Insait long pas Mista Basil i salim go long ICCC em tok i gat planti komplem i kamap olsem ol save ring na taim nogat man i ansa o bekim bai voismeil save kamap na yusim ol yunits bilong ol we dispela i no stret bikos ol i no toktok na unit go aut nating.

Mista Basil i tok insait long ol bikpela taun olsem Lae na Mosbi, ol kastoma i ken yusim B Mobail ol Digicel taim ol i no pilim gut long sevis bilong narapela. Tasol long ol ples em ol manmeri yusim stret Digicel fon long ring na toktok go

kam wantaim famili o mekim bisnis bilong ol. No gat arapela rot moa na taim dispela kain tenis i kamap em ol i lusim mani nating tru.

Dispela pas bilong Mista Basil go long ICCC i go tu long opis bilong Minista bilong Komyunikesen Jimmy Miringtoro na NICTA husat save go pas long lo bilong telefon na ol komyunikesen sevis insait long kantri.

Long las wik Mista Basil i askim ICCC long sekim na painimaut gut hamas tru Digicel i bin mekim long dispela taim em wok long kisim nating mani long ol voismeil insait long Papua Niugini.

Mista Basil i tok dispela em i no stret bikos planti tausen manmeri long PNG i lusim mani go nating tru long sevis we ol i no yusim na dispela inap kamap long sampela kain milien kina pinis we mobail fon ya i kisim nating tru. Olsem na em askim ICCC long mekim wok bilong em insait long dispela na lukim sapos sampela gutpela samting ken kam bek long ol pipel bilong Papua Niugini.

Bihainim dispela komplem na ol toktok, Digicel kampani i kam aut long las wik na tokaut olsem ol i stopim dispela na ol bai sasim tasol wanem samting i kamap bihain

long voismeil. Ton o mobail toktok ya bai givim kastoma sans long lusim tok save o stopim ring ol mekim. Bihain long voismeil em bai sas i kamap. Dispela em olsem olpela sistem bipo we fon bilong yu bai sas bihain long voismeil sevis.

Sif opereting opisa (COO) bilong Digicel Michel Herbert i tok bikpela tenkyu go long olgeta kastoma long givim bek olgeta toktok na tingting bilong ol long wanem kain sevis em Digicel i givim aut. Em i tok ol i harim na mekim ol senis nau. Olsem na ol i givim aut K1.5 milien mak bilong fri minit kol long olgeta kastoma.

No ken baim projek fi: Minista

I kam long pes 1...

- Kantri bai yusim Stended Beis Edukesen- Sekretary Tapo i tok dispela em olpela na gutpela sistem bilong edukesen long kantri.

Ol tisa husat i greduet long ol tisa koles long 1999 na kam long 2014 bai kisim trening long olpela sistem. Trening i stat pinis long las wik.

Minista Kuman i tok level bilong litresi o rit na rait long kantri i kam daun taim kantri i yusim OBE. Em i tok bikpela lukluk bilong dipatmen long SBE em long lainim ol sumatin long Tok Inglis.

Ol sumatin i mas lainim gutpela Inglis na save long toktok na rait wantaim.

Dokta Tapo i tok moa olsem olgeta tisa long kantri i kisim trening long ol tisa koles em long SBE na em i orait long kantri go bek long dispela SBE sistem bilong lainim ol sumatin.

-Narapela tok klia ol i mekim em - ol hevi bilong lip fe o balus tiket bilong ol tisa em wok bilong wan wan

provins long stretim na i no hetopis long Waigani.

Minista Kuman i tok em i no lukim bikpela hevi long dispela bikos ol tisa long planti provins i kisim lip fe bilong ol long taim. Na wan wan provins tasol i gat hevi long dispela.

Em i tok sapos ol planti provins inap long mekim gut wok long givim lip tiket long ol tisa wantaim mani gavman i givim ol, orait wan wan provins i mas bihainim na no ken sutim tok long Waigani.

Edukesen dipatmen i tok ol i lukluk long putim lip mani bilong tiket i go stret long pe akaun bilong ol tisa long ol i ken baim tiket o nogat em i laik bilong ol.

Tasol gavman inkam takis em bikpela hevi na dipatmen bai toktok wantaim Intenel Revniu Komisn (IRC) long rausim takis long lip fe mani bilong ol tisa.

Minista Kuman i singaut long olgeta tisa long go bek long skul na redi long 2015 skul yia bai stat long namba wan wik bilong Febreui.

Distrik edministreta bai sainim skul akaun

Stanley Nondol i raitim

OL DISTRIK edministreta bai sainim ol skul akun long helpim na daunim pasin korapsen i save paulim mani bilong ol skul.

Edukesen Minista, Nick Kuman i tok ol distrik edministreta long wan wan distrik bai i gat nem long olgeta skul insait long wan wan distrik bilong ol na ol hetmasta na prinsipal bai i gat signetsa olsem kaunta saining opisa.

Gavman i save putim fri edukesen mani i go stret long akun bilong wan wan skul na ol hetmasta na bot siaman bilong skul i gat nem long ol skul akaun.

Taim O'Neill gavman i putim fri edukesen, planti mani gavman i putim i go long wan wan skul tasol i gat askim olsem sapos ol hetmasta bilong skul na bot i mekim rait wok long mani bilong skul.

Planti komplem i kamap long palamen na long media olsem ol hetmasta na bot bilong sampela skul i paulim mani bilong skul gavman i givim long fri edukesen na projek mani ol papamama i save baim.

Minista Kuman i tok dipatmen i kisim pinis ripot bilong sampela skul i mekim pasin korapsen long paulim skul mani na i save long ol dispela skul na i putim was long dispela taim.

Minista Kuman i tok long daunim dispela pasin, em i givim tok orait long Seketeri bilong Edukesen long skruim tok save i go long olgeta elementri, praimer, haiskul na sekenderi skul insait long kantri long senisim signetsa bilong skul akaun.

Long dispela senis, distrik edministreta bai sainim akaun bilong olgeta skul. Em i tok ol het tisa na skul menesmen i mas plenim gut wok bilong skul long wanpela yia na distrik edministreta i mas save na sainim sek buk long rait taim.

Em i tok ol skul het tisa i save holim sek buk na sampela taim i sainim long ol wok bilong skul

tasol bikpela traime i save kamap long mani na planti komplem i kamap long mani i lus.

Ol skul long bus ples long no gat rot bilong kar i mas plenim gut wok bilong wan wan yia na wok wantaim distrik edministreta long yusim skul mani.

Aninit long nupela lo ol i kolim Distrik Atoriti Ekt, ol distrik edministreta i gat pawa long rausim o saspensim ol hetmasta na tisa sapos ol i asua.

Mista Kuman i tok gavman i putim bikpela mani long fri edukesen na bai putim was long mani i no ken lus. Sapos wanpela paul pasin i kamap long fri edukesen mani, bikpela mekim save bai kamap long husat i asua.

Biknem MLTR ben kam long Pot Mosbi



MLTR ben memba long taim bilong Pres kon-prens long Lamana las wik.

Isaac Kana i raitim

BIKNEM musik ben bilong Yurop na planti long PNG i save laikim ol singsing bilong ol, "Michael Learns to Rock" (MLTR) i bin kamap pinis long Pot Mosbi long las wik Fonde na long Sarere na ol i kamapim wan-pela namba wan taim musik pilai bilong ol long Lamana Gol Klap.

Nem bilong MLTR i pairap bikpela stret na Lamana Hotel we i bin wokim 100 pesen sponsa long ol i bin salim ol tiket long ausait em i pinis yet long Trinde 14. Na ol get sels tasol i stap. Tasol dispela tu i pinis long 4 klok long Sarere na ol i pasim get pinis.

MLTR i bin stat taim Jaschar Richter (lid singa/song raita) i givim wanpela CD bilong em i gat 20 singsing i go long skul poroman bilong en, Mikkel Lentz (gita man) long harim.

Taim Mikkel i harim ol dispela singsing em i laikim tumas na tupela i kisim tingting long kamapim wanpela ben. Ol i stat pilai long ol liklik kopi sop long ples bilong ol. Namba wan sapot tupela i bin kisim em long papa na mama bilong Mikkel.

Mama bilong Mikkel i bin kisim dinau aninit long nem bilong em, long helpim tupela long wokim namba wan rekot albam. Na Mikkel i tok sapos albam bilong tupela i no bin kamap gutpela, mama bilong em tasol bai bekim olgeta dinau, tasol no gat, em i kamap gut stret.

Planti salens i kamap long taim bilong wokim namba wan album, bikos ol i yangpela tumas na i no gat eks-piriens long musik bisnis.

Narapela bikpela salens em olsem kantri bilong ol, Denmark i laikim ol i mas raitim singsing bilong ol long tok ples bilong ol yet. Ol i tanim sampela long Tok Inglis i go long tokples Danish tasol bihain taim ol i harim olsem ol singsing bilong ol i kamap bikpela long United States ov Amerka ol i lusim.

Ol i traim long mekim nem wantaim ol singsing we narapela lain i raitim, tasol dispela i no bin kamap gut. Ol singsing i kamap gut na givim biknem long ol, em ol singsing bilong ol yet stret we lid singa bilong ol Jaschar i raitim na tokaut long ol narapela na ol i laikim.

Antap long dispela wan wan feveret bilong ol em olsem; Kare i save laikim song "Someday" bikos long vidio bilong en, em i givim narapela lukluk long song, Jaschar i lakim tumas "The Actor" bikos em i wanpela bilong ol namba wan song em i bin raitim na singim, na Mikkel i save laikim "Sleeping Child," bikos long mining i stap insait long song.

Tasol sori tru long bihain long namba 4 album bilong ol long 1999, bes gita pilaia bilong ol Soren i lusim ol na i stap bilong em yet.

Na i luk olsem olgeta singsin bilong ol i toktok long pasin bilong laikim o "Love". Ol i tok "Love" em i tok ples we i save karamapim olgeta yunives. Em i no save kea long tok ples, relijen na em i gutpela we bilong toktok long ol pipel long wol i go i kam.

Ol i tok kam long Papua Niugini em i "naispela tru". Ol i laikim long lukim ol Hailans man i singsing na danis long taim bilong konset bilong ol long Lamana Gol Klap long Sarere.

Ol i tok i luk olsem ol bai kam bek gen long PNG olsem na yumi redi tasol na putim yau. Ol i tok bai ol i go tu long Fiji na Solomon Islands na pastaim long ol i kam long PNG ol i bin go long Indonesia. Moa long dispela stori na tok we ol i bung wantaim ol nius manmeri, bai kamap long "Wantok Today" long Inglis long wik bihain.

Project fees, New uniforms, Text books? Start the year on a good note with all your back to school needs financed through a

BSP PERSONAL LOAN

- ✓ 100% unsecured loan
- ✓ Flexible repayment terms
- ✓ Loan up to K50,000
- ✓ Quick approval

QR Code: [QR Code]

320 1212 / 7030 1212 - 24/7
 servicebsp@bsp.com.pg
 www.bsp.com.pg

BSP Official Sponsor of the 2015 Pacific Games

Pablik Prosekuta mas lusim wok: Oposisen

Stanley Nondol i raitim

OPOSISEN lida, Don Polye i singaut long Pablik Prosekuta, Pondros Kaluwin long risain long wok bilong em bihain long nesanel kot i stopim Lidasip Traibunel long harim kot bilong Praim Minista Peter O'Neill long kot bilong K3bilien UBS dinau.

Nesanel Kot long Januəri 8 i stopim Lidasip Traibunel long go het na harim kot bilong Mista O'Neill bihain long Ombudsman Komisin (OC) i salim ol evidens bilong K3 bilien UBS komplem Olis bilong Pablik Prosekuta. Dispela i kamap bihain long loya bilong Mista O'Neill i salensim hevi bilong konstitusen i kamap long wok bilong Mista Kaluwin.

Don Polye, i putim dispela komplem bilong UBS long Obusmen Komisin i tok Nesanel Kot i stopim Lidasip Traibunel kot bikos Mista Kaluwin i mekim tupela samting long komplem bilong UBS we i kamapim hevi bilong konstitusen

Em i tok, namba wan samting em; Mista Kaluwin i askim Obudsmen Komisin long givim moa evidens long ol toktok bilong



Oposisen lida, Don Polye

dispela UBS dinau. Na namba tu em, Mista Kaluwin i lusim tupela bikpela komplem egensim Mista O'Neill we stap long komplem pepa na em putim narapela tupela komplem bilong em yet.

Mista Polye i tok em bin kisim

tupela mun long opis bilong Pablik Prosekuta long mekim disisen long komplem bilong PM long K3 bilien UBS dinau. Na wok bilong em i no kamap gut long pablik bai lukim.

Mista Polye i tok Mista Kaluwin i mas risain long pablik opis na nupela man i mas kisim ples long wokim wok stret long pait egensim ol bikpela korapsen long kantri.

Long wankain taim Atoni Jenerel na Minista bilong Jastis, Ano Pala i tokim Mista Polye long tok sori long ol toktok em i mekim long Mista Kaluwin.

Mista Pala long wanpela pas i go long midia i tok dispela hevi bilong UBS dinau i stap yet long suprim kot na ol toktok bilong Mista Polye em i no go stret long lo na lo i ken mekim save long Mista Polye.

Mista Pala i tok em i gat rait long kotim Polye na singaut long Mista Polye long kwik taim tok sori long Pablik Prosekuta na sapos nogat, bai opis bilong Atoni Jenerel i go pas long mekim save long Polye long em i mekim ol toktok egensim Mista Kaluwin taim hevi bilong UBS i stap yet long kot.

Nainpela Nupela haus kalabus bai kamap

Esther Bralyn Wani UPNG sumatin i raitim

OL haus kalabus long Papua Niugini i olupela na i bagarap. I no gat nupela haus kalabus na ol kalabus lain i pulap na no gat inap spes. Minista bilong Koreksenen Sevis (PNGCS), Jim Simatab i mekim dispela tok.

Nesanel Eksekutiv Kaunsel (NEC) i bin tok orait long wanpela rivi bilong Nesanel Prison Sistem we gavman bai kamapim gut sefti na sekyuriti bilong ol haus kalabus i stap moa long 10-pela krismas.

Dispela rivi i bai strongim ol lo i karamapim koreksenen long PNG, na trening bilong ol koreksenen opisa na apgredim CS Trening Kolis i kamap olsem Rijonal Koreksenen Sevis skul. Tasol ol i no bin kisim dispela mani olsem K2.5 milien long 2014.

NEC i tok orait long PNGCS long go autsait long baset na kisim mani bilong 9-pela nupela haus kalabus long dispela yia. Ol nupela haus kalabus bai kamap long Makrumanda long Enga, Kaut long Nu Ailan, Polonou long Manus, Vanimo long Sandaun, Hawa long Hela, Kiunga long Westen, Kerema long Galp, Bans long Jiwaka na Kuviria long Bogenvil.

Long wokim ol dispela 9-pela haus kalabus bai gavman i yusim mani mak olsem K700 milien. Dispela i bai kamap long Pablik Praivet Patnasip

polisi na lejisletiv fremwok. Tasol dispela em dianu mani we Treseri bai tok orait bikos long autsait dinau bilong kantri.

Minista Simatab i tok em i amamas long wok bilong Praim Minista Peter O'Neill na ol memba bilong em i tok orait long developmen bilong ol haus kalabus.

Em i tok moa olsem ol kalabus lain i pulap long ol haus kalabus bikos planti bilong ol em ol stap long wet kot. Ol i save wet olsem 3-pela krismas na bihain sampela bilong ol kot i save painim aut olsem ol i no brukim lo.

Olsem 5-pela krismas nau, 80 pesen bilong ol kalabus lain i save brukim kalabus na ranawe em ol lain i stap long wet kot. Ol i save les long stap long haus kalabus na hatwok nating.

Long dispela as, Minista i askim helpim bilong Polis Prosekusen, Lokal na Distrik Kot long rausim ol wet kot. Na tu em i tok ol kot i mas stap klostu long haus kalabus bai helpim ol long mani sait long karim ol kalabus man.

Ol kalabus lain i gat total namba olsem 4, 640. Ol total bilong man i brukim lo em 2 710, meri em 156 na ol pikinini man em 77. Total bilong ol man i stap long wet kot em 1,519, meri em 69 na ol pikinini man em 109. Ol 14 man i wet long dai.

Potape kisim taim long kalabus

Yakam Kelo i raitim

Nesanel Kot i salim memba bilong Komo Magarima Francis Potape i go long kalabus long sas bilong mekim hait plen na paulim K330,000 bilong kantri long dispela wik. Em bai kisim sas long tupela krismas na 6-pela mun.

Dispela sas bin kamap long wanpela JDPBPC miting resolusen long Disemba 22, 2010 long peim em yet wantaim ol komiti memba miting alawens we siaman (Potape) bai kisim K5,000 na ol komiti na ol edvaisa bai kisim K2,500 wan wan long wanpela miting long 2009 i go long 2010.

Narapela sas tu em long K60,000 Mista Potape bin kisim long giaman rot na narapela K270,000 we bin mekim giaman aplikesen long kisim kam long JDPBPC memba bilong Komo Magarima distrik.

Deputi Sif Jas, Jastis Sir Gibb Salika i tok lida i bin bagarapim pinis gutpela nem na rispek ol pipel bin putim long em. Jastis Salika i tok tu olsem em rausim wanpela yia kalabus bilong Potape long tripela krismas kalabus we em ken kalabus long tupela krismas na 6-pela mun tasol bikos em bin bekim bek ol mani em bin paulim.

Tasol Jas Salika i tokaut long disisen bilong em olsem ol lida i no ken traim long baim sas bilong ol long kam aut long kalabus taim kot i painim ol asua pinis long brukim lo. Wok bilong lida em long go pas long ol pipel olsem na ol mas soim dispela lidasip bilong ol.



Memba bilong Komo Magarima Francis Potape i go long kalabus.

Potape nau i joinim narapela tupela lida husat i kisim sas pinis long kalabus long asua bilong mani i paol o i no kisim mani stret bihainim stretpela rot na rekot. Tupela lida ya em Paul Tiensten, memba bilong Pomio na Havila Kavo, Gavana bilong Galp provins. Mista Kavo i stap ausait long beil na wetim apil kot bilong em.

Ol arapela lida husat i wetim Lidasip Traibunel Kot bilong ol em memba bilong Manus, Rooney Knight na memba bilong Not Flai Boka Kondra.

Lida bilong Tas Fos Swip Tim, Sam Koim i tok tenkyu long facebook long dispela wik long ol pablik na opis husat bin helpim ol wantaim ol wok painimaut go insait long rekot na ripot bilong ol lida na ol bikman bilong kantri we sampela i kam aut klia nau long kot.

Protes bilong asailam sika i pinis

MINISTA bilong Foren Afeas na Imigresen, Rimbink Pato i tok tenkyu long protes long Manus Asailam Sika i pinis bihain long ol sekyuriti fos i kontrolim gut.

Ol asailam sika lain long Manus i bin protes sampela de i go pinis bihain long ol i kisim ol sampela toktok long ol sampela lain long Australia we i no bin gutpela long ol.

Ol sampela asailam sika i protes na i pasim get na les long kisim kaikai na tu ol i no bin larim ol wokman bilong Senta kam long wok.

Taim hevi i kamap long Manus, Praim Minista Peter O'Neill i givim oda

long Sif Maigresen Opis bilong kantri, Mataio Robura long yusim posisen bilong em long kamapim plen long stretim ol hevi i kamap long Manus Asailam Sika Senta.

Mista Pato i tok bihain long hevi i pinis, Mista Robura i givim tok orait long ol sekyuriti bilong Asailam Senta long go insait long kemp na helpim ol lain long kemp husait i les long stap yet long Asailam kemp long Manus.

Mista Pato i tok ol sekyuriti long Manus i go insait long helpim ol lain husat i laik lusim kemp na ol liklik lain tasol i traim long go egens tasol ol

sekyuriti i rausim ol.

Dispela protes i pinis na olgeta refiji lain i go long kompaun bilong ol seif na no gat bikpela trabel o hevi i kamap long ol.

Ol polis fos tu i go stap na lukluk long sapotim ol sekyuriti sapos sampela hevi i kamap tasol hevi i go daun

Sampela de i go pinis i lukim sampela bilong ol dispela lain i protes long Manus i bagarapim ol yet. Sampela bilong ol i kisim tret na nil na samapim maus bilong ol yet. Na sampela i putim ol strong na sap samting long maus na daunim go insait long bel.

Minista Pato i tok wanpela helt tim nau i mekim

wok painim long ol dispela bagarapim ol i mekim long bagaraim ol long painimaut sapos ol i kisim sampela bikpela bagarap. Planti bilong ol i kisim marasin helpim.

Na sampela bilong ol i kisim sik pekpek wara.

Minista Pato i tok PNG em i demokretik kantri na ol asailam sika i gat rait long protes tasol helt bilong ol i namba wan samting. Na ol i mas rispektim husat i no straik na stap klostu long ol.

Minista Pato i tok tenkyu long gutpela wok bilong ol sekyuriti fos long asailam senta long daunim dispela protes bilong ol asailam sika lain.

Ol kastoma hariap long stretim pawa bil

OL kastoma long Mosbi i harim tok na kamap gut long stretim pawa bil bilong ol bihain long gavman i bin kamapim Stet ov Emejensi (SOE) long Januəri 7, 2015.

Mak olsem 30 na 40 kastoma i wok long kamap long PNG Power opis olgeta de long Godons long stretim pawa bil bilong ol.

Kontrola bilong SOE, Kepten Tom Ur i tok rekot bilong ol kastoma opis i soim olsem mani mak long K1 milien em PNG Power i mekim long las wik na planti manmeri moa wok long kamap taim ol bin lukim nem bilong ol i kamap long niuspepa bikos long pawa bil bilong ol.

Kepten Ur i tok planti manmeri husat bin kamap long PNG Power

opis long stretim pawa bil em ol lain husat save hait na pulim nating pawa go long haus na banis bilong ol.

PNG Power i no laik sasim ol tasol em askim ol long bihainim stretpela rot bilong kisim pawa sapla i go long haus bilong ol na baim sevis wankain olsem ol arapela. Sampela PNG Power wokman tu i tokaut olsem ol tu save yusim hait pawa saplai olsem na ol tu kam stretim pawa bil bilong ol, em i tok.

Olgeta manmeri i save olsem stilim pawa em brukim lo olsem na tausen manmeri i wok long kamap long opis long stretim ol bil bilong ol na aplai long nupela pawa lain, tok-save long ol mita i bagarap na laikim

long stretim gut mita long haus bilong ol, Kepten Ur i tok.

Ol kastoma husat bin kamap long PPL opis i tok ol i sori long stilpasin ol i mekim na tok tenkyu long gavman long givim ol sans long mekim samting stret.

Planti kastoma i wanbel long dispela stet ov emejensi (SOE) olsem em i no stret long arapela lain i save baim pawa bil na ol arapela save hait na yusim nating fri pawa.

Ol sampela kastoma husat bin aplai long nupela pawa lain pastaim long SOE bin kamap i tok tu long PNG Power i mas stretim aplikesen pepa bilong ol hariap na pulim pawa go long banis bilong ol.

Memba bilong Pot Mosbi Not Is i sapotim WHDF

**Esther Bralyn Wani
UPNG sumatin i raitim**

MEMBA bilong Pot Mosbi Not Is na Vais Minista bilong Spot na Pasifik Gems, Labi Amaiu, i givim K20,000 long Westen Hailans Developmen Forum (WHDF) long Gateway Hotel long Mande nait.

Dispela sek em i givim long wanem em i bin promis long sapotim WHDF long wanpela kaikai i bin kamap long Holiday Inn long 2012. James Marape i bin stap ges spika na makim Praim Minista taim em i no stap.

Siaman bilong WHDF Samson Komati, wantaim ol komiti i tok bikpela tenkyu na amamas long Labi Amaiu long sapot bilong em. Dispela i wokim ol long go het long wokim ol wok long ilektoret bilong em long 2015.

Mista Komati i tok WHDF i no save kisim helpim long mani sait long wanpela bilong ol 5-pela memba bilong Westen Hailans provins (WHP) taim ol i bin askim ol. Tasol ol i no wari na ol i wok strong yet long givim skul long ol memba bilong ol yet, na jenerel pablik

bilong WHP na PNG.

Em i tok ol i bin kisim K20,000 sek mani long James Marape long 2013. Dispela mani ol i bin yusim long 4-pela bus helt senta long Maunt Hagen (Koibuga- K5,000, Kuruk- K5,000, Tinsley- K5,000 na ol narapela) na nau dispela K20,000 long Amaiu i givim bai helpim long gutpela bilong Pot Mosbi na WHP.

Mista Komati i tok moa olsem WHDF i no save kisim helpim long mani sait long narapela hap. Ol i save kisim long ol presen na donesen tasol na long ol registresen mani bilong ol memba yet. Tasol long bilip bilong ol long God na wantaim liklik mani ol i gat ol i laik karim aut gutpela wok na mekim WHDF olsem primia provinsel developmen forum long kantri.

Em i tok bikpela tenkyu long ol komiti memba na forum memba olsem memba bilong Pot Mosbi Not Is, Labi Amaiu, Deputi Siaman, Tep Dami, Gloria Kilage, petron bilong ol George Bopi Kerepa na ol narapela tu i bin stap long presentesen.

nus Ol papagraun long Aropa i amamas long balus sevis



AIR Niguini balus i bin pundaun long Aropa ples balus long Bogenvil 4-pela taim nau bihain long 25 krismas.

Nesenal balus kampani i givim tupela pig wantaim ol stoa na gaden kaikai olsem tenkyu long papa graun bilong Bogenvil long ol i tok orait long balus i pundaun long ples bilong ol long Kieta, Sentrel Bogenvil long Atonomas Rijon bilong Bogenvil.

Dispela kalserele sere- moni i kamap long To- boroi vilis long Kieta we 6-pela grup papa graun bilong dispela ples balus i bung na i tok tenkyu long ol.

Air Niugini Jeneral Menesa –Kastoma na Maket Dominic Kaumu i kisim maus bilong Air Niguini i tok olsem dis- pela kain tumbuna se- remoni bai strongim wok pren bilong Air Niguini wantaim ol papa graun long em i ken mekim sevis i ran gut.

Em i tok Air Niguini i sapotim wok bilong gav-

man long kamap namba wan long kisim dispela sevis i go long Bogenvil bihain long 25 krismas we ol i amamas long ol papa graun long givim tok orait long graun bi- long ol.

“Nau tasol mipela i opim dispela ples balus we mipela i laikim helpim bilong olgeta man na meri insait long komyuniti na tu gavman long mekim dispela sevis long raun.” Kauma i tok.

Long dispela se- remoni wanpela maus- man bilong ol 6-pela papa graun grup, Gabriel Sala, i tok ol i amamas long Air Niguini long mekim toktok bi- long ol long karim kaikai.

Em i skurim tok i go na tok tenkyu long Air Niguini long kisim sevis i kam bek we nau ol i luk- luk long moa bisnis long ples bilong ol.

Lida bilong ol meri Bernadine Naviung i tokim ol olsem ol i ken givim wok long ol yut na meri long sapotim wok long ples balus eria.

TENKYU: Air Niugini i bin bung wantaim ol papagraun bi- long Aropa ples balus long las wiken na wokim tok tenkyu kaikai wantaim ol. Poto i soim Jenerel Menesa-Katomas Maketing, Dominic Kaumu wantaim ol papagraun. Wan- pela long tupela pik we Air Niugini i bin givim long kaikai seremoni. Poto: Air Niugini Pablik Rilesens



Koreken Levi kamap bosman bilong DIC

**Joylyne Karato UPNG
sumatin i raitim**

DIPATMEN bilong Komyunikesen na In- fomesen (DCI) i makim Koreken Levi olsem Ek- ting Deputi Seketeri bi- long dispela yia taim bos bilong ol i stap long malalo.

Koreken Levi i wan- pela nius ripota na loya bipo

Long 10-pela yia nau, em i wok olsem Ekting Senia Ligal Opisa bi- long Dipatmen bilong Praim Minista na Ne- senel Eksekutiv Kaun- sel nau em i kisim dispela nupela posisen. Em i save wok tu

olsem Polisi Edvaisa bi- long Infrastraksa, Len na Risos, Sosel Welfe, Lo na Oda na tu skulim ol yia tu Lo sumatin long Yunivesiti(UPNG) long Pablik Intenal Lo kos.

Mista Levi i tok em bai wok bung wantaim Ne- senel Infomesen na Komyunikesen Teknoloji Atoroti (NICTA) long karimaut rural komyu- nikesen projek na luk- save gut long ol bisnis bilong gavman.

“Dispela em i wanpela bikpela bisnis we mi bai edvaisim gavman long ol i ken lukluk long wok bilong ol yet , na ol i noken givim aut ol pro- jek long ol praivet ejensi long wokim.

Em i tok taim em I stap long opis,em bai painim aut ol bisnis ejensi i stap aninit long lo bilong gavman na sapos ol inap long wokim bisnis o no gat

Em i mekim klia tu olsem RCP tu em i wan- pela gavman projek we Wol Benk i fanim long mekim kamap bikpela ICT na gavman sevis long ol long we eria I no gat telekominikesen sevis long em.

As tingting bilong dis- pela em long konektim ol gavman ejensi wan- taim intanet long liklik mani long mekim isi long komyuniket wan- taim ol gavman bisnis.

Helt Minista stopim Isten Hailans PHA bot

MINISTA bilong Helt na HIV/AIDS, Michael Malabag i givim tok oda long stopim Isten Hailans Provin- sal Helt Bot na wanpela inkwairi i mas kamap long long sekim wok bilong Bot (PHAB) bihainim ol ripot olsem i no gat gutpela wok wanbel namel long ol helt woka bi- long Provinsal Haus sik na menesmen.

“Helt Atoriti i no strong long go pas long wok bilong helt olsem na wok bilong ol helt woka i no kamap gut. Ol ripot i tok olsem ol helt woka i no gat strongpela ting- ting long mekim gutpela bilong ol na dispela i bagarapim tru helt sevis deliveri i go long ol pipel bi- long Isten Hailans Provinsal Haus sik.



Minista bilong Helt na HIV/AIDS, Michael Malabag

“Ol helt woka bilong haus sik i gat bel kros long ol menesmen bi-

long haus sik olsem na ol i no wok gut. Wok bilong ol i slek olsem ol i no givim gutpela sevis long bi- hainim tingting bilong mi olsem Minista. Em i soim olsem Provin- sal Helt Atoriti i no gat strongpela pawa long menesim helt sistem long provins,” Mista Malabag i tok.

“Olsem na wantaim ol pawa mi kisim long Provinsal Helt Atoriti Ekt 2007, mi stopim Isten Hailans Provinsal Helt Atoriti Bot long mekim wok olsem Helt Atoriti. Ol pepa wok bilong saspensim olupela bot na tu long makim nupela keateka bot i bai redi bihain long dispela wik na bai mipela i tokaut,” Minista Malabag i tok.

“Wantaim saspensin mi givim oda long wanpela independen

inkwairi bai kamap long sekim ed- ministresen bilong Isten Hailans Provinsal Helt Atoriti bot (EH- PHAB) long givim ol trupela piksa bilong hevi i stap long gavanens.

EHPHA bot inkwairi komiti bai gat ol opisa bilong Dipatmen bi- long Pesenel Mensesmen, Opis bilong Stet Solisita na Nesenel Di- patmen bilong Helt. Ol pepa wok bilong mekim inkwairi na tems ov referens bai redi klostu taim nau.

EHPA bot inkwairi komiti bai i go long provins long pinis bilong wik long stat wokim wok bilong paini- maut menesmen wok bilong PHA bot.

Wok bilong i bai ino winim tu- pela wik, na mi singaut long ol gutpela wokman meri long Isten

Hailans Proivnsel Haus sik na ol sapot woklain bilong PHA long strongim wok yet long bringim helt kea long ol pipel,” Mista Malabag i tok.

“Mi laik singaut long ol woklain bilong haus sik wantaim ol menesa bilong yupela long dau- nim bel hevi bilong yupela olsem askim bilong mi em long kamapim gutpela sevis na gutpela gava- nens long administresen.

“Mi singaut long ol pipel bilong Isten Hailans, na provinsal admin- istresen na ol stekholda long wok olsem tim na soim strongpela tingting bilong gavman long bringim gutpela helt long ol pipel bilong yumi insait long dispela kantr,” Minista Malabag i tok.

Tafeto helt senta i gat nupela embulens



Memba bilong Daulo long Isten Hailans Ron Ganarofu (lephan) i givim ki bilong wanpela kar i go long distrik tresera bilong Daulo distrik, Gideon Jonathan.
Poto: Sape Metta

WARI, belpen na kra i bilong ol siklain, ol mama husat i save kamap long karim pikinini na ol helt woka long Tafeto Helt Senta long Daulo distrik, Isten Hailans long kisim wanpela embulens, em i pinis nau.

Na bikpela tok amamas na tenk yu em i mas go long MP na memba bilong Daulo Ron Ganarofu husat i bin kisim wanpela ten sita embulens na givim long opisa in sas (OIC) o meri husat i go pas long helt senta em Sista Maryanne Slowa long Tafet long mun Desemba.

Sista Maryanne i tok

Tafeto helt senta em Katolik misin i go pas long ranim. Olsem na long pasin bilong bilip na beten, Papa God i harim beten bilong ol na bringim dispela embulens i go long ol.

"Mipela i bin beten planti insait long las 15 yia na mipela i bilip olsem Papa God i harim na luksave long nid bilong Helt Senta na bringim embulens i kam, samting we mipela i bin wet longpela taim tru long kisim," Sista Maryanne i tok.

Long taim bilong givim dispela embulens Mista Ganarofu i tok, dispela embulens em i wanpela aset o kago bi-

long gavman, olsem na em i singaut i go long ol helt woka na ol lokal lain man na meri long Tafeto long lukautim na yusim beten bilong ol na bringim dispela embulens wok bilong helt senta.

Em i tok em bai kisim bek embulens sapos ol i no yusim stret na i yusim long long mekim ol narapela wok.

Dispela embulens bai mekim wok long trenspotim ol siklain, ol mama bilong karim pikinini na ol riferel i go i kam long bikpela haus sik long Goroka.

Long wankain taim tu Mista Ganarofu i givim wanpela tipa trak long

helpim wok long ol han rot long Asaro na Daulo distrik, wanpela foa wil draiv kar long distrik ikonomik sekta, wanpela dabol keb kar long distrik treseri na tupela moto baik long mekim wok bilong Dipatmen bilong Agrikalsa na Laipstok.

Dispela ol kar na moto baik bai sevim ol pipel na mekim wok bilong distrik administresen long Daulo distrik.

Mista Ganarofu i mekim komitmen o tok promis tu long baim tupela kar na donetim wan wan kar i go long Asaro Rurel Helt Senta na Asaro polis sampela taim long dispela yia.

Senia mejistret i nidim helpim

Joylyne Karato
UPNG sumatin i raitim

WANPELA senia mejistret long Boroko, NCD i nidim helpim long go kisim namba tu operesen long Amerika. Em i bin kisim strok long las yia na bai em i mas go bek long namba tu operesen.

Jeff Karengi bilong Enga husat i mekim wok bilong senia mejistret inap 34 krismas i bin kisim dispela sik strok na em i bin go long Filipins las yia long operesen tasol em i no inap daunim dispela sik.

Dispela hevi bungim em las yia tasol long wanpela apinun we em i pundaun nating na i no inap long kirap na em i go long imejensi seksen

long Pasifik Intenesenel Haus sik (PIH).

Dispela sik bilong em i kamap bikpela nau na em bai em i go long operesen long bikpela haus sik long USA.

Kos bilong go long USA em i K100,000 we em i nidim helpim bilong yupela long em bai go lukim bikpela ol dokta.

Long de 24 Januəri 2015 bai ol famili i wokim wanpela fanraising kaikai long Gerehu Stets 3B long bungim mani long helpim em.

Sapos u gat tingting long helpim em yu ken go long dispela hap na sapos yu laik save moa ringim Jeff karengi long Pon 72863417.

TTU laikim gutpela sindaun long hauslain

Sape Metta i raitim

PESONEL haijin, klinpela ples long ol hauslain na gutpela sindaun insait long helti envairomen long ol hauslain komyuniti em i bikpela wari bilong wanpela lokal non-gavman ogenaiesen long Isten Hailans – Touching The Untouchables (TTU).

Na eksekutiv dairekta bilong ogenaiesen Esther Sailas long wanpela bung bilong Sastenebel Komyuniti Helt Promosen na Seif Madahud long mun igo pinis i tok, gutpela helti sindaun insait long ol hauslain komyuniti bai inap kamap sapos ol pipel i senisim tingting na pasin bilong ol.

Mis Sailas husat i bin wok olsem wanpela komyuniti sios helt wokmeri bipo long em i lusim na kirapim TTU i tok, Papa God i bin givim em tingting long kirapim TTU. Long wanem, ogenaiesen i luksave na wari we em i gat bikpela tingting long karim ol hevi bilong ol lokal pipel.

Em i tok, bikos long dispela tingting na wari, TTU bai wok hat long bringim ol trening program we em i ken lainim na skulim ol lokal lain long kamapim ol wok insait long ol komyuniti na wanwan hauslain we ol i ken yusim dispela save ol i kisim long kamapim gutpela helti sindaun long ples bilong ol.

Mis Sailas i tok, wanpela gutpela piksa bilong gutpela na klinpela helti hauslain em long Savisa hauslain

long Henganofi Distrik.

"Olsem na long kamapim gutpela helti hauslain long Henganofi distrik na Isten Hailans provins, ol man na meri i mas wok strong long kamapim hauslain bilong ol olsem Savisa hauslain", Mis Sailas i tok.

Long wankain taim tu TTU i save trenim planti ol lokal meri long kari-maut wok bilong viles bet atendens (village birth attendance) o helpim ol mama long ples long taim bilong karim pikinini, strongim komyuniti helt na seif madahud programs long Henganofi distrik.

Mis Sailas i tok, taim TTU i statim operesen na ranim ol wok bilong en, em i no kisim wanpela helpim na sapot i kam long Isten Hailans provin-sel gavman na ol arapela stekholda tu.

Em i tok long planti ol hauslain insait long ol rurel na longwe ples we i no gat gutpela helt sevis i save go long en, ol memba bilong TTU i save i go, long wanem, ol i gat wari long helpim ol narapela husat i gat sik o ol mama husat bai karim.

Mis Sailas i tok planti ol mama i save lusim laip bilong ol long taim bilong karim, na dispela em ino gutpela.

Olsem na ogenaiesen bilong em i nidim helpim long strongim wok bilong em long helpim ol mama na ol arapela man na meri long ol rurel hauslain.



Bishop Rev Ledimo bilong Yunaited Sios, Papua Ailand Rijen long Salamo Milne Be Provins i kisim nambawan helikopta i pundaun long Salamo long 14 Januəri 2015. Bihain long ol i honarim dispela helikopta, helikopta i mekim tupela medivec operesen long dispela ples pinis.

TOK SORI



Taim em dai
Januəri 17, 2015

Justin Hansu Kili

Menesmen na ol Wokmanmeri bilong Word Publishing Company i salim bikpela Tok Sori i go long Celina Kili, wantaim ol pikinini, long dai bilong papa bilong ol, Justine Hansu Kili, long Sarere 17, Januəri 2015. JK husat i bin stap wantaim Word Publishing Company olsem Jenerel Menesa na gutpela bosman na pren long yia 2005.

Belsori bilong mipela i stap wantaim yupela olgeta long dispela taim. Papa God bai givim yupela belisi long dispela taim bilong sore.



Malolo Gut JK!
WANTOK Niuspepa tim

Bisnis meri winim CPL Ka promosen

WANPELA bisnis meri bilong Boera long Sentral Provins em i laki wina bilong Stop N Sop "Wish Upon A Car" promosen!

Misis Iru Kevau, laki promo wina i kisim ki bilong prais bilong em, wanpela nupela Toyota Hilux long ai bilong David Young, Sif Opereting Opisa bilong CPL Grup na Kadai Maboi, Asisten Stua Menesa bilong Stop N Sop Waigani Sentral long Fonde apinun Januari 8.

Oi i bin wokim dro long Trinde apinun, Januari 7.

Iru i tok em i gat ol transpot bisnis na em i gat ol PMV bas we ol i save karim ol pipel long ples bilong em long go i kam long baim ol samting long Stop N Sop Waigani Sentral tripela taim long wan wan wik. Iru i tok olsem em yet i save baim ol samting long Stop N Sop long haus bilong em yet na tu long bisnis bi-

long en.

Em i bin kisim 5-pela rafol tiket entri long taim promosen i stat long Oktoba 2014. Namel long 33,000 entri, ol i bin makim tiket bilong en.

"Mipela amamas wantaim Iru, husait i kisim kaikai bilong em i save baim samting long Stop N Sop. Mipela i amamas olsem dispela prais i go long wanpela gutpela kastoma bilong mipela," David Young, i tok.

Oi narapela Operesen woklain bilong Stop N Sop wantaim olgeta famili na pren bilong wina bilong Boera ples i bin stap long taim em i kisim ki bilong kar.

I gat tok win i stap olsem CPL na Stop N Sop bai wokim sampela moa bikpela promosen resis olsem insait long yia, ating bai ol i putim wanpela hap graun na haus olsem win prais.



Wina bilong "Wish Upon A Car" promosen bilong Stop N Sop 2014, Misis Iru Kevau i sekhan wantiam Asisten Stua Menesa bilong Stop N Sop, Waigani Sentral, Kadai Maboi. Foto: CPL Marketing

Eks benk wokmeri i ranim haus kai bisnis

Veronica Hatutasi i raitim

WANPELA kaiba o haus kaikai long Kokopau bot stop long Buka Pasis, Atonomas Rijn bilong Bogenvil (ARoB) i givim gutpela sevis long planti pipel bilong rijn.

Dispela em long sait bilong kaikai, givim wok na tu, long givim sans long ol ples lain i kisim mani long lukautim ol yet na ol famili bilong ol.

CSJ Kaiba em dispela haus kai na mama bilong en em Philomena Huriku Chung na famili.

Philo i bilong Siwai long Saut Bogenvil na em i marit long Joe Cheung em hapkas Selau long Buka na Saina.

Oi leta i mekim nem bilong kaiba (CSJ) em ol namba wan leta long nem bilong tupela pikinini meri bilong ol.

Olgeta lain i save kolim mama bilong kaiba, Philo i bin wok planti yia wantaim benk (BSP na Westpac) long Mosbi na bihain, long Buka. Tasol long yia 2008, em i bin risain na statim CSJ Kaiba long Kokopau, em ples long hapsait bilong Buka Pasis we i konektim Bogenvil wantaim Buka Ailan.

Philo i tok em i bin laik traim nupela samting na tu, bihain long lukautim mani bilong ol narapela pipel long planti yia, em i bin laik mekim mani em yet na olsem, em i statim haus kai ya.

Na em i no sori nau long go insait long liklik bisnis we i wok long lukautim famili na ol haus-lain bilong em long Buka na Siwai.

Philo i sanapim kaiba bilong em long gutpela hap stret bikos dispela em hap we ol PMV kar i kam long Bogenvil wantaim ol pipel long wokim bisnis, soping, go long skul o long ples o narapela hap bilong PNG na wol i stop long en na painim kaikai.

Sapos ol i lusim ples long bikmoning na bihainim longpela rot i kam long bikples Bogenvil, bel bai hangere na planti manmeri na pikinini i save go long CSJ long painim naispela kaikai we ol wok meri bilong Philo i redim.



CSJ KAIBA MAMA: Eks benk wokmeri na nau bisnis meri, Philomena Huriku.



KLINIM PIS: Belinda Tikui, wanpela wokmeri long kaiba i wasim na klinim ol pis long moning yet bilong redim long kukim.

rais na kakaruk na kumu stiu, rais, kumu na bif stiu, kaukau, kumu na kakaruk stiu, kakaruk na sips, pis, kreipis, stek, pok, kaukau na taro wantaim pis na kakaruk, prai rais na moa. Oi kain flewa sof dring na kolwara i stap tu.

I gat aiskrim tu i stap.

CSJ Kaiba i ples we sampela bikman bilong PNG i bin kaikai long en na Praim Minista, Peter O'Neill i wanpela long ol.

Philo i tok long 2013, Praim Minista i bin raun i go long ARoB long opisel opening bilong silim o putim kolta long Kokopau na Selau Rot, CSJ i bin redim kaikai bilong Mista O'Neill na delegen bilong em.

Long 2011, Deputi Praim Min-



REDIM KUMU: Tupela wokmeri, Michaeline Tamang na Claire Balu i redim ol kumu i stap. OL Foto: Veronica Hatutasi

YAMI PIS: Tupela long ol pis bilong Belinda long klinim.



ista, Sam Abal taim em i stap Ekting Praim Minista, na lain bilong em i bin go kaikai long CSJ Kaiba.

Philo i amamas tru olsem ol bikman long kantri olsem i kaikai long kaiba bilong em, o ol i askim em long redim ol kaikai bilong ol.

Kaiba ya i no save sot long ol kaikai na ol abus bilong solwara. Ol ples lain i save karim ol kaukau, banana, singapo, taro na ol kain kumu na prut na salim long Philo.

Oi ples lain bilong ol ailan olsem Taiof na oil narapela ailan na ol ples long nambis i save karim ol pis, kreipis na urita na salim long Philo. Em i save skelim ol pis samting na baim long ol.

CSJ Kaiba i gat ges haus we 4-pela rum ol man i kam long sampela wok o bisnis o ol turis i painim ples bilong slip i save rentim long wanpela nait, wik, potnait o mun tasol long dispela taim, wanpela famili i wokim pemenen rent long en.

Philo i bin statim balk frisa mit holsel, tasol i gat sampela asua long ol frisa na long dispela taim, frisa mithaus i stap pas.

Tasol Philo bai go het long givim sevis i go long ol pipel bilong ARoB na ol narapela hap bilong kantri na wol.

Em i gat ol gutpela wokmeri bilong em i save mekim ol wok i stap long CSJ Kaiba na skruim sevis i go moa.



Yut, Meri na Famili
Pastor Barbara Lunge

Tok bilong God long oraitim sik

BUK Song 103:2-5 i tok olsem; Mi mas litimapim nem bilong Bikpela, na mi no ken lusim tingting long gutpela samting em i bin mekim long mi. Em i save lusim olgeta sin bilong mi,

na em i save mekim orait olgeta sik bilong mi. Bikpela i kisim bek mi na mi no i dai. Em i save marimari na sori moa yet long mi. Olgeta taim mi stap long graun Bikpela i save givim ol gutpela samting long mi na inapim mi.

Em i mekim olsem na mi kamap yangpela gen na mi stap strong olsem tarangau.

Olsem na yumi mas save olsem Jisas em yet i bin karim ol sin na sik na olgeta hevi bilong yu wantaim em i go antap long diwai kros na em i bekim olgeta rong na mekim save yu mas kisim, wantaim bodi i bruk na blut bilong em i dia tumas. Lukim long 1 Pita 2:24.

Tude yu ken singaut long Jisas na em bai lusim sin bilong yu na oraitim sik long bodi bilong yu. Olgeta hevi na wari bilong yu na trabel em bai karim bilong yu.

"Bikpela bai i kam olsem bikpela wara i tait taim win bilong Bikpela i kirap na sakim wara na mekim wara i ran spit tru.

Na ol manmeri long olgeta hap bilong graun, stat long hap sankamap na i go inap long hap san i go daun.

Oi bai save long strong na biknem bilong Bikpela na ol bai i pret long nem bilong en na ol bai i aninit long en.

Joshua 1:8 Yu no ken lusim tingting long dispela buk bilong lo. Na yu mas was gut long bihainim tru olgeta tok i stap long lo. Sapos yu mekim olsem orait olgeta arapela samting yu mekim bai i kamap gut tasol.

Yumi manmeri bilong graun i save hariap long go long dokta bilong graun tasol yumi no save hariap long God husat i kamapim yumi na gen em i baim bek yumi pinis.

Tok bilong God em i save sanap strong long olgeta taim, olsem na bilip na bihainim na bai yu stap gut.

Katolik sios i harim krai bilong ol Asailam sika

Esther Bralyn Wani
UPNG sumatin i raitim

KATOLIK Bisop Konprens (CBC) i kisim krai bilong ol asailam sika long Manus na askim gavman long hariap na luksave long ol bikos ol yet i no inap long tok-tok na ol i no pilim seif.

Deputi Siaman bilong ol sios na Asbisop bilong Pot Mosbi, John Ribat, i tok ol dispela pipel i no kriminel, ol i gat kain kain risen long kam long hia, na yumi no inap larim ol stap long Manus na wokim nogut long ol.

Em i tok olsem ol dispela lain i no laik stap long Papua Niugini. Ol i laik go stap long Australia.

Em i askim Praim Minista Peter O'Neill long lukluk long dispela wantaim wanwok bilong em Praim Minista bilong Australia, Tony Abbot.

Ol Katolik Bisop Konprens i wari long sefti bilong ol asailam sika i

stap long Manus. Ol i stap olsem 18 mun na no gat kot i kamap. Ol i no mekim wanpela rong long wanem ol i laik bai ol i hariap na stretim ol pepa wok na salim ol i go long narapela kantri.

CBC i laik PNG gavman wantaim gavman bilong Australia long wok bung wantaim long hariap na stretim nid bilong ol dispela pipel.

CBC i tok dispela hangre straik i mas stop na senta bilong ol i mas kamap normal gen. Ol i mas lukim gut ol askim bilong ol long wanem ol tu i man. Em i wok bilong PNG gavman long stretim wantaim helpim bilong Australia gavmsn.

Long wankain taim, ABC nius i ripot long las wik olsem sampela asailam sika i les long kaikai na ol i katim skin bilong ol yet wantaim resa.

Katolik Sios i laik kisim tok orait long go lukim ol dispela lain long wan wan taim tasol Imigresen Atoriti long Manus i no tok orait.



Katolik Bisop Konfren (CBC) Siaman, Victor Roach na Deputi Siaman bilong ol sios na Asbisop bilong Pot Mosbi, John Ribat i sindaun na glasim sindaun bilong ol asailam sikas.

Tupela Lutheran Misineri i selebretim 70 krismas marit

...Pikinini bilong ol makim PNG long atletiks

JANUERI namba 3 bihain tasol long nupela yia, 2015, tupela Lutheran Sios misineri bilong kantri Amerika, i bin wok long PNG stat yet bihain tasol long Wol Woa 2 i bin selebretim namba 70 marit anivesari bilong ol.

Wanpela pikinini bilong ol tu i bin makim PNG long atletiks na wok long Nesanel Spots Institut long Goroka long 7-pela krismas.

Roland na Ameer Brandt bilong Iowa long Amerika i bin selebretim namba 70 marit anivesari bilong ol wantaim ol famili, ol bubu na poroman long Croixdale long Baypot, Minnesota long Amerika we ol i stap nau long en.

Roland Brandt na Ameer Gunlikson i bin marit long Wartburg Sem-

inari long Dubuque, Iowa long Amerika long Desemba 28, 1944.

Long yia 1945, taim Wol Woa 2 i pinis, tupela i bin bekim singaut long wok olsem ol Lutheran Sios misineri wantaim Ameriken Lutheran Sios na Evanjelikel Lutheran Sios bilong PNG.

Stori bilong ol long PNG i bin stat long 1948 taim tupela i statim tupela de wokabout wantaim ol lain i karim ol kago bilong ol long ples Ega i go olsem long ples Kaukau long statim nupela sios misin long Omkolai, Gumine long Simbu Provins we ol i wok olsem misineri na autim Gutnius i go long ol pipel long eria.

Long wankain taim tu, ol i givim edukesen na helt sevis i go long pipel.

Long ol yia 1950 na 1960, ol i bin go malolo long Amerika, tasol ol i kam bek long ples ol i laikim tumas long Omkolai.

Taim ol i kam bek long malolo, Lueran sios i salim ol i go wok long Tok Ples Trening Kolis long Rintebe long Isten Hailans we ol i bin wok inap long 1972 taim ol i lusim PNG bihain long 22 krismas wok misineri long dispela kantri.

Tupela i bin wok olsem misineri long ol Lutheran kongrigesen long Sherman, Saut Dakota long Amerika inap long 1977 taim ol i kam bek gen long PNG na long dispela taim, ol i go wok long Katherine Lehmann Skul long Wau, Morobe Provins. Dispela em i bod-ing skul long ol pikinini bilong ol misineri sumatin.

Roland na Ameer i bin salim 7-pela pikinini bilong ol long dispela skul long ol yia long 1950 na 1960 long wokim praimer skul.

Tupela i bin lusim PNG long 1980 bihain ol i wok long narapela 4-pela yia long kantri. Dispela i mekim ol i wok long PNG olsem ol misineri long 26 krismas olgeta.

Bihain ol i lusim PNG na long 20 yia i kam, Roland i skruim wok misineri long Waterloo, Iowa na Sen Paul long Minnesota eria bilong Amerika.

Seventi krismas bilong tupela wantaim i soim komitmen bilong ol long wanpela narapela, ol famili bilong ol, na singaut bilong Bikpela long kam wok olsem ol misineri long PNG.

Long 1990, ol i makim ples Still-

water long Minnesota olsem ples we ol i stap long en bihain ol i ritaia o pinis long wok.

Pikinini bilong ol, Tom em mama i bin karim em long Finsafen long olpela ami haus sik long Buangi 1947. Taim em i pinisim praimer skul long Wau, Morobe provins, em bin go long haikul long Brisben, Australia na skul yunivesiti long Amerika.

Tom i bin stap na wok long PNG wantaim meri bilong em Ena na tupela pikinini bilong ol inap long 1989 taim ol i lusim PNG.

Long 1983 inap 1989, Tom i bin makim PNG long nesanel na intenesanel level long pilai atletiks na tu, wok long PNG Institut bilong Spots long ol dispela yia.

Sen Charles i gat nupela peris pris

Veronica Hatutasi
i raitim

SEN Charles Lwanga Katolik Peris long Gerehu, Nesanel Kapitel Distrik i gat nupela peris pris.

Long las wik Sande, peris i bin kisim nupela spirituel lida bilong ol na em Pater Bill Fleming MSC.

Bikpela haus lotu i bin pulap stret na sampela i bin sanap ausait long naispela lotu seremoni peris i bin holim long tok welkam long nupela peris pris, na tok gutbai long Pater Cosmas Patan MSC.

Pater Bill em i holim wok olsem Vika Jenerel bilong Pot Mosbi Katolik Asdaiosis, tasol em bai peris pris tu nau bilong Sen Charles Lwanga.

Em i bilong kantri Australia tasol i wok long PNG long sampela yia nau, moa yet long Bereina na Mekeo eria, Sentral



Prosesio bilong wokim lotu long opim nupela Sen Charles haus lotu bilding long June las yia. POTO: FAIL POTO

provins.

Long las yia, Sen Charles Peris i bin gat sampela hevi na Asdaiosis sios edministresen i bin putim Pater Cosmas olsem lukaut pater na em i bin mekim dispela wok gut insait long 8-pela mun.

Long wankain taim, edministresen i bin lukaut peris kaunsil na eksekutiv na ol i wok gut wantaim

Pater Cosmas long ranim ol wok long peris i kam inap nau.

Asbisop bilong Pot Mosbi, John Ribat i bin go pas long seremoni we i bin lukim em i givim blessing na ki long Pater Bill olsem nupela spirituel lida bilong Sen Charles, em i wanpela bikpela peris wantaim planti kongrigesen memba insait long Pot

Mosbi Katolik Asdaiosis.

Taim Pater Bill i tok tenkyu long Sen Charles peris i welkam na kisim em, em i tok em bai wok gut wantaim peris kaunsil na ol perisina long skruim wok olsem spirituel lida bilong ol pipel long peris.

Em i tok tenkyu tu long Pater Cosmas husat i bin go insait olsem lukaut pater na mekim gutpela wok taim peris i bin bungim hevi long las yia.

Taim Pater Cosmas i tok tenkyu long interim peris kaunsil na eksekutiv, na ol perisina long wok gut wantaim em insait long 8-pela mun i kam inap las wik, em bin askim kongrigesen long givim gutpela sapot long Pater Bill husat nau i kamap peris pris bilong ol.

Bihain long lotu, i bin gat bung kaikai we ol perisina yet i bringim ol kaikai na serim wantaim nupela na olpela peris pater na tok tenkyu long ol.

Ol sios i ken helpim pipel long senisim pasin

Mathew Yakai
i raitim

OL SIOS long dispela kantri i gat ol ansa long ol sosel hevi, na i no gavman, Nesanel Dairekta bilong Teseri Studen Kristen Felosip (TSCF), Tom Lepatu, i mekim dispela hap tok.

Mista Lepatu i tok ol samting we gavman i mekim long stretim ol sosel hevi i no nap wok bikos dispela em ol spirituel hevi na i moabeta long ol sios i yusim ol spirituel pawa long stretim ol sosel hevi.

stretim ol hevi taim ol i yusim gutpela Kristen pasin na Tok bilong Bikpela long buk Baibel.

Mista Lepatu i tok planti milien kina gavman i putim i go insait long ol kain program bai lus nating na olsem, em i askim olsem ol sios long wok bung wantaim long stretim ol spirituel hevi long sosaiti na laip bilong ol manmeri.

Em i tok taim ol manmeri i bihainim gut Tok bilong God long laip bilong ol, sosaiti bai senis taim pipel i lusim ol pasin i no stret we i wok long bagarapim kantri bilong yumi.

“Sios long dispela kantri i mas go pas long strongim jastis

na senis,” Mista Lepatu i tok.

Mista Lepatu i bilip strong olsem bikpela samting we i wok long stopim developmen long dispela kantri em ol sampela pasin tumbuna i no gutpela ol pipel long nambis i go long hailans i save bihainim na mekim yet.

Em i tok ol misineri i bin kamap pastaim long ol nambis ples, tasol ol pipel i bilip yet long ol tumbuna bilip we i stopim ol gutpela wok developmen taim long hailans rijon, ol pipel i wokim ol kalt na wanpisin pait (traibal pait) i save stopim gutpela developmen long go het.



TOK PISIN NEWS

from Radio Australia

radioaustralia.net.au

Harim TOK PISIN long
Radio Australia
101.9FM
Port Moresby

Tok Pisin Service
6am - 7am 6080; 7240(KHZ)
7pm - 9pm 5995; 6020; 9710; 1280(KHZ)



BLEKPELA BOKIS: Ol daiva i painim blekpele bokis long AirAsia we i bin kres na bagarap long Disemba 28, 2014, na planti i amamas olsem poto i soim. *Poto: ABC*

aninit long solwara long dispela wik Mande na kisim i kam antap.

Em i tok wok painim i go het yet long kokpit vois rekoda.

Kokpit vois na falit rekoda em ol bikpela samting long save watpo Flait 8501 i bin bagarap na pondaun long Disemba 28 na kilim 162 pipel.

I kami nap nau, wok painim i gat long en ol lain bilong Amerika, Saina na ol narapela intenesenel nevi sip i painim 40 bodi.

Dairekta bilong Nesenel Ses na Reskyu Ejensi, SB Supriyadi i tokim ol niuslain i tok planti bodi i pas long kebin na em i hat long go long dispela hap.

Long 162 pipel long balus i bin dai, 7-pela tasol i bilong ol narapela kantri olsem Saut Korea, Singapo, Malesia, Ingran na Frans, taim olgeta narapela i bilong Indonesia.

Ol i no painim yet as bilong birua, na Trensport Ministri bilong Indonesia i stopim AirAsia long mekim ol ron bilong em.

Histori mas egen-sim terorism

MOA long wan milien pipel na sampela lida long olgeta hap bilong wol i mas olsem hap long kraik long fridom na luksave long ol lain we ol teroris i bin kilim 12-pela pipel i dai long Paris, kapitel siti bilong Frans long las wik.

Mas i bin stat long Sande apin-un long Place de la Ripablik klostu long Charlie Hebdo opis, ples we ol i bin kilim 12-pela pipel long las wik Trinde.

Ol opisel bilong Frans i tok samting olsem 1.3 milien pipel i bin pas pas wantaim long ol strit long taim bilong bikpela win na kolna mas wantaim ol fleg bilong Frans ol i raitim "Mi Charlie" long en. Sampela i klep na sampela i singaut taim ol i mas.

Ol opisa i tok dispela em i bikpela mas tru long histori bilong Frans.

Vienna polis holim tupela meri i laik joinim IS

OL polis long Vienna, Austria i holim tupela pikinini meri ol i ting olsem ol i laik joinim ol teroris grup, Islamik Stet o IS.

Tupela i bin laik go long Syria long maritim ol militen paitman long hap.

Polis ripot i tok ol i bin holim tupela gel i gat 15 na 16 krismas long Salzburg we ol i laik go ofaim ol yet olsem ol meri bilong ol IS paitman.

Polis i tok meri i gat 16 krismas i wok long rikrutim ol yangpela meri long kamap ol meri bilong ol IS paitman na dispela i gat 17 krismas i wanpela bilong ol.

PNG Asailam sika i kamapim trabel

SAMTING olsem 100 ol Asailam sika o refuji long Australian Ditensen senta long Manus i no laik kaikai na ol i pasim maus bilong ol i stap.

Ronnie Knight Palamen memba bilong Manus Open long PNG i em i no ting wari bilong ol asailam sika olsem olii no kaikai na kamapim bagarap long bodi bilong ol yet i no bikpela tumas.

Ronnie Knight i mekim displa toktok bihain long ol ripot olsem wanpela asailam sika bilong Egypt i bin kaikaim ol resa na tu, sampla i samapim maus blong ol.

Ol dispela ripot i tok samting olsem 100 asailam sika i no laik kaikai long soim gavman bilong Australia na PNG olsem ol i no laik stap moa long ditensen senta long Manus.

Sampela i wari olsem no gut dispela trabel bai kamapim narapela bikpela pait olsem dispela i bin kamap long stat bilong 2014.

Wanpela asailam sika bilong Iran, Reza Berati, i bin dai long dispela pait.

Tasol Mista Knight i tokim Radio Australia olsem Australia na PNG nau i mas stretim dispela, no gut bikpela hevi bai kamap gen.

Klostu Solomon Airlines bai statim sevis ken i go long

Fiji

Gavman blong Solomon Ailan na Fiji i bin stretim dispela long wanpela tok orait ol i bin sainim long las wik.

Ol hevi we i stap pastaim long tupela Solomon Airlines na Fiji Airways i bin stopim ran bilong balus namel long tupela kantri long Julai las yia we ol i no stretim yet.

Jenerel Menesa Operesen bilong Solomon Airlines, Gus Kraus, i mekim dispela toktok bihain tupela gavman blong Solomon Islands na Fiji i wanbel long ol ea sevis i mas stat bek gen.

Em i tok bihainim dispela agri-men tupela gavman i sainim long dispela wik, Solomon Airlines bai plai i go i kam long Fiji long wiken bihain, na Fiji Airways bai statim bek sevis long Febueri.

Mista Kraus i tok, maski ol bai statim bek ol sevis, Solomon Airlines i laik long ol i mas toktok na stretim ol hevi we i stap pastaim long ol i bin stopim ol ea sevis.

Em i tok Solomon Airlines i laik lukim ea sevis bisnis namel long tupela kantri i gutpela long tupela wantaim, na i no gutpela long Fiji tasol.

Mista Kraus i tok dispela agri-men long statim bek ol ea sevis namel long Solomon Ailan na Fiji i bikpela tumas.

Vanuatu i muvim

ol pipel bihainim ol taitwara

O li muvim ol pipel i go long tripela ivakuesen ples long Port Vila, Dairekta bilong Vanuatu National Disasta menesment ofis, Shadrack Welegtabit i tok.

Em i tok ol atoriti long Vanuatu i surikim ol pipel i go long tripela ivakuesen senta long Port Vila bihain long ol bikpela taitwara i bin bagarapim ol ples bilong ol.

Mista Welegtabit itok ol bikpela ren, na strongpela win i wok long hamarim kantri nau i bin kamapim ol dispela taitwara.

Emi tok, ol i askim lain bilong Water, Sanitation na Hygiene (or WASH) long helpim ol dispela pipel Ol dispela bikpela ren na strongpela win i wok long kamapim tu ol hevi long Papua New Guinea na Solomon Ailan long lukim olsem ol i gat klinpla wara long dring, na tu olsem ol i gat ol gutpela toilet long yusim.

Solomon Ailan i lusim planti milien dola

OPIS bilong Odit Jenerel long Solomon Ailan i tok i luk olsem ig at planti millien dola bilong gavman we i no gat rekot long rot ol i bin yusim mani long en long wanwan yia.

Odit Jenerel bilong Solomon Islands, Robert Cohen i tok long dispela moa long 54 milien

Solomon dola we ol i bin yusim long 2013 - 2014 ripot bilong ol.

Mista Cohen i tok em i no kliia long ol rekot sapos ol i yusim tru tru planti mani bilong gavman o no gat, long wanem em i no gat rekot bilong 'voucher' long rot ol i yusim mani long en.

Em i tok gavman nau i kamapim sampela nupela loa na sistem insait long opis bilong Odit Jenerel bilong lukim olsem i mas gat gutpela rekot long mani bilong gavman.

Mista Cohen i tok narapela hevi tu em long sampela gavman dipatmen, ol stet own entaprais na provins i no save wokim hariap ol odit ripot bilong ol.

Em i tok wanpela long ol em Honiara City Council we i no wokim wanpela ripot stat long yia 2010.

WOLNIUS:

Painim blekpele bokis

OL daiva bilong Indonesia i painim pinis wanpela blekpele bokis i gat ol flait o ran bilong balus infomesen bilong AirAsia balus i bin kres o pondaun na bagarap long Java Si tupela wik i go pinis na kilim dai 162 pipel i bin stap insait long balus, ol opisel i tok.

Henry Bambang Soelistyo em man i go pas long wok bilong painim dispela balus i tok 4-pela daiva i bin painim flait rekoda



Ramu NiCo helivim Ono Nazarene Sios

MASKI Ramu NiCo main insait long Madang prosins ino mekim wanpela win moni yet, Ramu NiCo is wok long helivim ol papagraun lain yet wantaim kainkain helivim.

Long Jenuari 6, 2015, Ramu NiCo i bin baim sampela ol metirials bilong wanpela Nazarene Sios mak long K6, 237.72 na givim igo long Ono Nazarene Sios insait long Maigari Inlen Paipain ananit long Usino LLG, Madang provins.

Ples Ono em stap antap long dispela 135 km paipain bilong Ramu NiCo we I karim ol slari or nikel na kobalt long KBK Main igo daun long Basamuk Rifaineri eria.

Kampani i luksave olsem wok sios insait long Ono na Madang em bikpela samting we bai daunim ol kainkain birua pasin. Wok sios tu bai i nonap paulim tingting bilong ol pipol long ol kago samting na tingting bilong ol bai stap stret na kamap gutpela sitizin.

Dispela helivim tu i no stap ananit long Ramu NiCo Projek MOA tasol Kampani i kamapim i helivim ananit long luksave olsem kamapim gutpela sindaun insait long kominiyuti na kantri bai gutpela bilong olgeta lain pipol.

Ol metiriel kampani i baim em 7-pela plywood 2.4 x 1.2M x 4MM, 1-pela roll Sisalation 1250MM x 60M, 15 Zincalun Gutter 125MM x 2.4M, 25 Zincalum Bracket, 3 paket Galvanized Nil clouts 30 x 2.5MM, 15 paket Jolt het Nil 75x3.75MM, 10-pela paket Jolt had Nil 50 x 2.8MM, 3 paket Jolt had Nil 25x1.60MM, 43-pela Hardwud Treated Timba 18/2.40, 126-pela Hardwud Treated Timba 28/4.50, 162-pela Hardwud Treated Timba 36/4.50 na 135-pela Hardwud Treated Timba 30/4.50.

Dispela em bikpela helivim igo long dispela sios kongregesin na ol lida man bilong sios na asples tu i hamamas long en. Sios em ol i bin kamapim long 1992 na em i gat 22-pela krismas we i lukim ol timba, wol na pos bilong sios i sting na buruk nambaut na i nidim bai ol i kamapim nupela haus lotu. Tasol maski haus i sting na bagarap, ol pipol i save lotu yet na sapos ol i kamapim nupela haus lotu areap bai dispela i helivim ol pipol.

Dispela helivim i bin kamap bihain long wanpela rikost we diputi siaman bilong Inlen Paipain Asosiesin Mista Sam Aimai i kamapim long Kampani i ken helivim na Kampani i areap tasol long helivim bilong wanem kain helivim bai helivim ol pipol long lotu pasin na tu bai kamapim gutpela na wanbel pasin namel long Kampani na ol lenona.

Misis Okias Aimai i makim maus bilong sios kongregesin, ol sios na asples lain na tok tenkyu long Ramu NiCo long dispela bikpela helivim. Dispela helivim bai benefitim mak long 150-pela sios memba long ol asples olsem Sebruku, Yawa, pomotaporo, Upa, Kumus, Saruwai na Ono we olgeta i stap ananit long Usino LLG.

Misis Aimai i tok sios i bin nidim stret ol dispela metiriel tasol nogat mani long baim na



Olpela sios we ol bai senesim.



Sait bilong olpela sios we i sting nau.



Ol asples lain husait i kisim ol donesin.



Mista na Misis Aimai wantaim pikinini blo tupela sanap wantaim ol donesin.

dispela helivim bai lukim nupela haus bai kamap na tu dispela donesin em i kam olsem wanpela bikpela Niu Yia presen.

Mista Sam Aimai i makim maus bilong Maigari Inlen Paipain Asosiesin na tok tenkyu long Ramu NiCo long dispela helivim. Maigari em wanpela bilong ol 4-pela lenona asosiesin insait long Ramu NiCo Projek. Narapela 3-pela em KBK, Kostel na Basamuk Lenona Asosiesin.

Mista Aimai i tok dispela kain donesin bai helivim sios na tu bai kamapim gutpela na wanbel pasin namel long Ramu NiCo na ol papagraun we ol papagraun bai gat tingting olsem Kampani i wok bung wantaim komyuniti.

Em i tok kain helivim tu bai mekim ol pipol i sapatim Ramu NiCo long ol wok bilong em maski kampani i gat hevi wantaim win moni na tu hevi long sait bilong prais bilong nikel

na kobalt we i daunbelo tumas.

Em i tok tenkyu tu long gutpela baret bilong wara we Ramu NiCo i mekim arere tasol long sios we bai lukim ren wara i ron gut na bai nonap bagarapim sios haus.

Ramu NiCo Projek i save helivim tu planti ol sios na ol narapela eria long kainkain wok projek ananit long MOA na tu arasait long MOA long KBK main, Basamuk Rifaineri na Kostel Paipain tu.



Ramu NiCo redi long givim

Insait long moa long tupela yia, Ramu NiCo i sanapim pinis malti bilian Kina Ramu Nikel Projek, na nau mipela i redi long komisanim.

Bihain long mipela i kisim olgeta tok orait na stretim ol teknikal wok redi, Ramu NiCo i go het wantaim bikpela wok konstraksen long namba tu hap bilong 2008. I kam inap nau, olgeta bikpela konstraksen wok long Krumbukari main sait na Basamuk Rifaineri i pinis, na projek i stap redi long kisim komisanim o tok orait long mekim wok. Long wol tu, dispela kain hariap sanapim em i no kamap bipo long wanpela kain bikpela projek olsem, na i daunim olgeta

salens bilong graun na masin bilong mekim wok.

Ol dispela namba i soim klia mak bilong wok mipela i pinisim:

- Moa long 4.5 miliar kubik mita bilong graun wok i pinis
- Klostu 195,000 kubik mita simen i silip pinis
- Klostu 48,000 tan stil biding i sanap, hap long ol em ol nupela
- Moa long 2,000 yunit masin i sanap redi
- Moa long 227 kilomita bilong baret na proses paip i silip (antap long 135 kilomita slari paipain)

**Wanpela
Ramu NiCo,
Wanpela
Komuniti**

Nupela webasit bilong NSL bai helpim pablik long sevim mani

Stanley Nondol i raitim

NAMBAWAN Super Limited (NSL) i kamapim nupela webasit long helpim ol memba na pablik long kisim moa save long seving na ol i ken sevim mani long bihain taim na bai ol i ken kisim bikpela winmani.

Sif eksekutiv opisa bilong NSL, Garry Tunstall i tok kampani i stretim websait i kamap nupela long helpim ol memba na pablik long kisim moa save long supanesen.

Dispela websait bai helpim ol pablik long yusim kalkuleta long kisim save long hamas mani ol bai sevim wantaim NSL long hamas yia na hamas winmani ol bai mekim bihain long ol yia bilong seving ol memba yet i makim.

Ol pablik i ken yusim dispela websait long kisim moa save long wok bilong NSL.

Mista Tunstall i tok nupela web-



Sif eksekutiv opisa bilong Nambawan Super Limited, Garry Tunstall na COO, Charlie Gilichibi i opim nupela websait long Pot Mosbi.

sait bai isi long yusim. Ol pablik i ken save moa long wok bilong NSL, em bai helpim ol pablik na memba long plen long seving na amamas wantaim winmani bihain long ol i pinis long wok. Dispela websait bai helpim tu ol hom baia long sevim mani na sanapim haus bilong ol aninit long Hom Onsip Skim program bilong NSL.

Mista Tunstall i tok long 2014 NSL i mekim bikpela senis long mekim isi long helpim ol memba bilong em.

Ol sampela wok NSL i mekim anit long dispela senis em;

- Stretim ol rijonal senta long Lae, Hagen, Goroka, Kokopo, Aopi Senta long Pot Mosbi long mak we i bungim teknologi bilong wol wantaim ol gutpela samting bilong wok ol memba i ken kisim gutpela sevis.

- Stretim sevis bilong SM sevis long BMobail na Digidel

- Stretim ol kol senta wantaim ol

nupela teknoloji

Nupela websait em i isi long yusim na i gat kalkuleta long ol memba bai yusim na bai save long hamas mani ol bai kisim bihain long ol i pinis long wok.

Dispela bai helpim ol memba long apim seving mani wantaim NSL na bai ol i save olsem seving bilong ol i ken gro kiwk na mekim bikpela winmani.

Mista Tunstall i tokaut olsem kampani bai muvum opis bilong NSL i go long olpela palamen haus long taun, Pot Mosbi namel long 2015.

Nambawan Super bai salim 2014 anuel stetmen i go long ol 18 brens long kantri long ol memba i ken save long hamas mani ol i gat wantaim NSL. Ol memba bai go long wan wan brens na kisim stetmen long abrusim ol stetmen bilong ol i no ken go long han bilong nara-pela.

LNG ges bai givim pawa saplai long Mosbi

Stanley Nondol i raitim

ExxonMobil PNG Limited na gavman bilong Papua Niugini i sainim agrimen las wik long Pot Mosbi long yusim LNG gas long givim pawa saplai long Pot Mosbi.

Aninit long dispela agrimen, PNG LNG bai givim pawa saplai long mak bilong 25 mega wat (em bikpela saplai) bilong pawa i go long PNG Power Limited long apim pawa saplai long Mosbi stat long Jun 2015.

Na tu, PNG LNG bai givim 50 mega wat long pinis bilong 2015. Total pawa saplai LNG projek bai givim em 75 megawat.

Long taim bilong sainim dispela agrimen, Praim Minista Peter O'Neill i tok LNG ges bai helpim ol bisnis na pipel long kisim gutpela sevis bilong pawa.

Mista O'Neill i tok Mosbi nau i wok long yusim 150 megawat pawa saplai long wan wan de. Tasol PNG Power inap long givim saplai long 130 megawat na i givim bikpela

hevi long PNG Power long kamapim inap pawa long wan wan de.

Dispela agrimen namel long gavman na ExxonMobil bai helpim na givim 200 megawat pawa saplai long bihain bikos siti i wok long gro moa yet.

Aninit long dispela agrimen LNG bai givim 20milien kubik fit bilong neturel ges long wan wan de long kamapim pawa saplai insait long 20 yia.

Dispela em antap long ExxonMobil ges komitmen em i gat wantaim Hela provins. LNG bai yusim ges long givim pawa saplai long Hela provins. Agrimen i stap pinis.

Aninit long dispela agrimen gavman na developmen patna i skruim ol developmen bilong petroleum na ol arapela bisnis olsem paipain laisens i go long P'nyang fil i go long ExxonMobil PNG wantaim lukluk long skruim LNG projek aninit long Oil na Ges Ekt.

Mista O'Neill i tok i gat bikpela ges i stap long kantri na bai moa wok painim i kamap yet long kamapim moa ges bisnis long kantri.



Ekting Minista bilong Petroleum na Eneji, Ben Micah na Menesing Dairekta bilong ExxonMobil PNG, Peter Graham i sainim MoU wantaim Praim Minista, Peter O'Neill na ExxonMobil prodaksen menesa, Andrew Barry.

NPCP givim K415m winmani long gavman

NATIONAL Petroleum Company of PNG (NPCP) i givim K415 milien winmani i go long gavman long las wik.

Dispela winmani i kamap taim PNG LNG ges i go aut long wol maket long mun Me, 2014 taim prais bilong oil i stap antap yet.

Dispela K415 milien winmani NPCP givim long gavman em bikpela winmani long histori bilong kantri long wanpela bisnis bilong gavman i kamapim na givim bek long gavman.

Siaman bilong bod bilong NPCP, Frank Kramer i tokaut long ful winmani bilong kampani long 2014 na

givim i go long Independen Pablik Bisnis Kopresen, IPBC.

Dispela winmani i bilong pinis bilong fainensel yia long Desemba 31, 2014 na NPCP i givim olgeta i go long gavman.

NPCP grup i makim gavman long kisim mani bilong PNG LNG projek.

Menesing Dairekta bilong NPCP, Wapu Sonk i tok kampani i mekim bikpela winmani taim kantri i salim ges bilong PNG LNG projek hariap tru i go long wol maket long mun Me, 2014.

Kantri i salim ges long Epril 2014. Wok konstraksen bilong

LNG i pinis kwik na ges i go aut 7-pela mun bipo long taim developa na gavman i bin makim.

Mista Sonk i tok dispela i lukim NPCP i mekim moa winmani na ol i tokaut long bikpela winmani em ol i givim i go long gavman nau.

Mista Kramer i tok bod bilong NPCP i amamas long givim dispela bikpela winmani go long gavman na wanpela kaikai bilong LNG projek i kamap taim kantri i salim ges long wol maket.

Em i tok dispela i kamap bikos prais bilong oil long wol maket bin stap antap.

Tasol Mista Kramer i tok prais bi-

long oil long wol maket i kam daun nau na i no wankain olsem bipo taim kantri i salim ges long las yia.

Em i tok NPCP bai putim was long prais bilong oil long wol maket na lukluk long salim ges long rait taim long em i ken mekim winmani na givim bek long gavman.

Gavman i gat 16.57 pesen sea long PNG LNG na NPCP i lukautim dispela sea aninit long IPBC.

Gavman i putim NPCP olsem wanpela indepeden kampani long lukautim intres bilong gavman long oil na ges bisnis long kantri na givim winmani i go long gavman.



KOMENTRI

Hariap long painim narapela kantri bilong ol lain asailam sika

Las wik ol lain asailam sika husat i stap nau long Manus ditensen senta i bin mekim bikpela protes na sampela i lokimolyetlongwanpela seksen bilong ditensen senta naino laik kaikai.

Sampela i samapim maus bilong ol na i tambu long kaikai na dring wara inap gavman i harim krai bilong ol. Ol i mekim dispela protes bihain long ol i harim olsem gavman bilong Australia bai i no inap larim ol i go insait long Australia. Ol dispela lain i tok ol i no laik tru long stap hia long PNG.

Gavman bilong Australia i bosim dispela ditensen senta long Manus na i tambu tru long ol man nabaut na ol nius lain tu long go na kisim ripot long wanem samting i kamap long dispela hap.

Ol stori bilong dispela trabel i bin kam long ol dispela lain refuji yet. Ol yet i kisim piksa bilong ol samting i kamap insait long ditensen senta na salim i go long ol nius lain long Australia.

Gavman bilong Australia na PNG tu i hariap long tokaut olsem i no gat trabel i kamap. Ol i tok i gat kaikai tasol ol dispela lain yet i les long kaikai na ol i lokim geit na stopim ol lain bilong karim kaikai i go long ol.

Sampela ripot i tok 200 pipel i tambu long kaikai na sampela bilong ol i airaun na ol i karim i go long haus sik.

Ol dispela lain insait long ditensen senta husat i kamapim dispela trabel i tok ol ipret tru long ol polis bilong PNG i go insait long



Jada 0151

senta.

Ol i kisim poto bilong ol polis autsait long banis na salim tu i go long ol ovasis nius lain. Ol i tok ol i no laik wankain pasin i kamap olsem las yia we polis i go insait long stopim trabel long ditensen senta na wanpela man bilong Iran i bin dai.

Ol ripot i kamap bihain i tok em i bin dai long han bilong ol PNG.

Gavman bilong Australia i sutim tok long sampela autsait lain long helpim ol dispela lain bilong ditensen senta long kamapim dispela protes.

Ol i tok em liklik lain tasol i kamapim dispela trabel long dis-

pela senta. Na gavman bilong PNG tu imekim wankain toktok olsem Australia, bikos olgeta samting i stap long han bilong Australia.

I gat bikpela pret i kamap nau bikos ol dispela lain i stap moa long 18 mun pinis long Manus na wok bilong painim narapela kantri long kisim ol i no ran hariap.

Australia i tokaut pinis olsem dispela lain bai i no inap go sindaun long Australia. Ol i wok long askim gavman bilong ol narapela kantri long kisim ol dispela refuji.

PNG i bin tok orait pinis long kisim sampela bilong ol dispela lain husat i refuji tru. Tasol gavman i wok long stretim yet ol pepa na

arapela samting bilong ol dispela lain.

I gat tu narapela bikpela askim i kamap. Sapos ol dispela lain long Manus ditensen senta i les long stap long PNG na ol i kamapim kain protes olsem, ating mobeta PNG imas strong long Australia i hariap long painim narapela kantri.

Sapos i no inap, orait givim oli go long han bilong Yunaitet Nesen na bai ol i go stap long kemp bilong ol refuji UN i save lukautim.

Dispela pasin ol i mekim long protes na tambu long kaikai em i mak nogut. Na ol toktok ol i mekim long sekyuriti bilong PNG i bringim sem long kantri bilong yumi. Em i

soim tu olsem ol dispela lain i no refuji tru.

Ol i ranawe long painim gutpela laip tasol long ol kain kantri olsem Australia. Ol i no laik sindaun long ol kain kantri olsem PNG. Ol i soim trupela kala bilong ol tupela taim nau long kain protes olsem long tambuim kaikai.

PNG tu i mas askim yumi yet, watpo na yumi tu i holim kalabusim ol dispela lain? Yumi no gat kros wantaim ol. Wanem belpen ol i gat em i samting bilong ol wantaim Australia long stretim.

Yumi mas hariap na rausim ol dispela lain i go long narapela kantri sapos ol i no laik stap hia long PNG.

Lida bagarapim wanbel bilong pipel



yia olsem ol i gat wok painimaut go het yet long planti lida long politiks na tu long ol gavman dipatmen na opis insait long kantri. Ating sapos ol i go het na pinisim gut ol wok painimaut bilong ol na stat long kotim ol, ating bai nem bilong ol lida i pulap long kot haus. Em sapos gavman i sapotim wok bilong Tas Fos Swip em nau yumi ken lukim olsem lo i mekim wok bilong em long sasim ol lida husat save bagarapim kantri long pasin korapsen bilong ol.

Ating ol dispela sas tu i opim ai bilong sampela lida husat i save olsem ol i mekim sampela rong pasin pinis wantaim mani bilong ol pipel. Olsem na ol bai wok hat long hariap putim ol dispela mani i go bek long stretim akaun na

rekot i stap gut. Nogut bai lo i holim ol liklik taim na ol tu inap go long kalabus olsem nau yumi harim na lukim stori bilong ol tripela lida pinis.

Bikpela samting em yumi mas save gut olsem sapos yu lida em yu stap long sia bilong rispek na wanbel we ol pipel i givim long yu. Sapos yu lukim ol kain kala kala mani na amamas na kalap go insait long dispela, em nau bai yu bagarapim dispela rispek na wanbel ol pipel givim long yu.

Pipel i makim ol lida long wok strong na kisim ol sevis na developmen kam long ples na tu kirapim kantri bilong yumi. Tasol taim ol i abrusim dispela mak bilong wok bilong ol, em nau wanpela mani bai stat long lus long sait sait.

Narapela tu em ol pipel tu save givim bikpela hevi na salens long ol lida long singautim mani olgeta taim long praivet bisnis na famili wari bilong ol yet. Dispela save mekim ol memba i painim

mani go na putim han go insait long rong basket em nau rekot bilong mani go krangi na lida ken go long kalabus long dispela.

Narapela tu em lida bin mekim planti promis tumpen long taim bilong kempen olsem na em mas putim mani go long stretim ol dispela mauswara bilong em. Planti taim em mani bilong narapela wok tasol lida isi tasol mekim pepa na salim mani go long ol ileksen promis wok.

Lida i mas sanap strong long olgeta kankain salens na hevi olsem bikos em posisen bilong kisim salens na bungim hevi olgeta taim. Sapos yu krangi, em nau yu go stret long kaikai braun rais long Bomana.

Ol lida husat gat sampela asua i stat, hariap stretim nau bai yu ken sindaun gut long wok bilong yu long ranim gut kantri na sevim ol pipel bilong yumi inap long 2017 nesenel ileksen we ol pipel ken mekim disisen gen long dispela taim.



Published Weekly, Thursday, for Word Publishing Company, Ltd. P.O. Box 1982, Boroko, NCD Papua New Guinea

Telephone: (675) 325 2500

Fax: (675) 325 2579

Email: editorial@wantok.com.pg

Websait: www.wantokniuspepa.com

Pe bilong wanpela via. 52 niuspepa

Ples:	Air:
PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00

General Manager Elizabeth Konga

Editor Veronica Hatutasi

Published at Able Building Complex, Sec 58 Lot 02, Waigani Drive.

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general terms acceptance are available at Word Publishing Company Ltd and are set out full on the display advertising form.

Fud sekyuriti program long Olsobip

OLSOBIP Lokal Level Gavman long Westen Provins bai kirapim wanpela vestabel o kumu kaikai projek long strongim fud sekyuriti long eria, wantaim sapot na helpim bilong Ok Tedi Developmen Faundesen (OTDF).

Dispela projek bai helpim ol fama na pipel long dispela LLG eria long strongim fud sekyuriti na tu, long kisim mani long en.

Ol toktok i kam long OTDF i tok ol i traim dispela komesel faming projek na bai em i kamap olsem modul fam long ol narapela i kam bihain.

Dispela projek bai stat long ples Golgobip bikos dispela ples i gat ples balus we Twin Ota balus bilong ol lain Komyuniti Main Kontinuing Agrimen i save mekim ran long Tabubil i go long en.

Dispela bai opim tu sans long ol pipel i salim ol kumu na gaden kaikai i go long ol Ok Tedi Main wok lain.

Long las wik Fraide, OTDF i bin kisim tupela sekmani wantaim mani mak inap long K90,000 i kam long Olsobip LLG long sapotim na go het long dispela projek.

Presiden bilong Olsobip LLG, Jim Takindang na Deputi Presiden, Godfrey Siakeng na Not Flai Rijonal Developmen menesa, Belden Dasa i bin givim dispela mani i go long Sif eksekutiv opisa bilong OTDF, Ian Middleton insait long

wanpela seremoni i bin kamap long OTDF Egrikalsa Senta long Tabubil.

Dispela i kamap bihain tupela grup ya i bin sainim wanpela agrimen long Desemba 15 las yia.

Aninit long agrimen, Olsobip LLG bai painim mani bilong dispela kumu projek ol i kolim Central Fairwol Growth Centre we LLG i plen long kirapim na promotim fud sekyuriti na tu, rot we ol komyuniti long eria i ken kisim mani long en.

OTDF Not Flai na Main Viles tim lida, Miape Baupupu i tok OTDF bai sapotim projek long givim ol sid, ol gaden tul na teknikel sapot long program wantaim mani we LLG i givim.

Mista Takindang i tok long sampela yia, LLG i bin painim taim stret long kirapim dispela projek bikos helpim mani ol i kisim long gavman i liklik tumas, na ol i no save kisim mani hariap. Na tu, i no gat save-man long teknikel eria o lojistik long helpim ol komyuniti bipo long OTDF i kamap.

Mista Midelton i amamas long luksave na bilip we ol Olsobip LLG memba i soim long OTDF na em i tokim presiden olsem OTDF bai wok strong long lukim olsem projek i ran gut.

Em i tok em bai raun i go lukim ol fama taim ol kumu na kaikai i redi long sampela taim long dispela yia.

Ples Golgobip i stap 34 kilomita is long Tabubil.



CEO bilong OTDF, Ian Middleton na Not Flai Rijonal Developmen Menesa, Belden Dasa i kisim sekmani long Presiden bilong Olsobip LLG, Jim Takindang na deputi bilong em, Godfrey Siaken. Poto: OTDF

Wail Paul (kakaruk) kiau i win tru

Dispela ples we ol i tok 'yu no save, yu yet go na lukim' i gat planti kainkain abus em i stap. Yu yet kolim, abus bilong nambis, abus bilong solwara, pres wara na bus tu em ol i stap.

Na long dispela mama, Helen

Sase, bilong Yagana hauslain long Okapa distrik long Isten Hailans husat long namba wan taim i go raun wantaim famili bilong em long Savaiviri viles long Malalaua distrik long Galp provins, dispela ol kiau bilong bus o wail paul i paulim em,

long wanem, em i ting olsem dispela em ol kiau bilong pukpuk.

Na long painim aut, taim ol as-ples viles lain i praim dispela 20 kiau long praipan, emi teis nais, na winim tru ol kiau bilong kakaruk tu ya.

Pik bisnis i bikpela samting

PIK i gat bikpela wok insait long pasin tumbuna bilong PNG.

Antap long dispela na moa yet, long dispela taim, pik i save pulim mani i kam insait long ol lain i lukautim na salim pik.

Piksa i soim Jacinta Molo ol i save kolim em tu long Kanage bikos em I wanpela pani meri, wanpela mama Selau long Buka i laik kukim kaikai bilong ol pik i stap. Dispela mama i save wok long CSJ Kaiba long Kokopau, Buka. Mama bilong dispela kaiba i save lukautim tu ol pik long wanpela hap graun bilong famili long Selau, 10-pela minit longwe long Kokopau taun.



RSPCA i askim midia long sapotim wail laip bilong PNG

ROYAL Sosaiti bilong Privensen long Kruelti long ol Enimal (RSPCA) long PNG i singaut long midia long sapotim wail laip bilong PNG taim ol i stop long soim ol piksa bilong ol enimal ol i holim pasim.

Ol i tok holim pasim ol enimal long salim em i enimal trafiking na i no stret.

RSPCA komiti memba, Hellen White i tok sampela taim ol i save lukim ol piksa i soim ol enimal ol i putim long liklik banis, o taitim ol na midia i save tok ol laik salim o wokim ol gutpela toktok long dispela pasin. Ol i askim midia long helpim ol na sevim ol wail laip bilong PNG na no ken putim kain ol

piksa long wanem ol pikinini bai ting em i gutpela pasin long wokim olsem long ol enimal.

Ol wokman na meri bilong RSPCA i tok moa olsem yumi mas lusim dispela pasin bilong holim pasim ol enimal bilong kisim mani long wanem ol i stap long banis bilong Dipatmen bilong Envairomen na Konsevesen Fauna Proteksen Ekt. Long dispela em i tambu long ol pipel long holim pasim, kilim na salim ol dispela enimal.

Dispela lo i banisim ol kumul na sikau bilong diwai.

Tasol Mis White i tok moa olsem sampela enimal ol i salim long

strit i no inap pinis hariap tasol sapos yumi lukautim bai ol i stap yet bilong ol jeneresen bihain.

Pot Mosbi Nature Pak i sapotim RSPCA long kempen na ol i bai gat wanpela awenes de wantaim RSPCA long pinis bilong Februari long Wanem ol i stap long Nature Pak, Michelle McGeorge i tok mipela i save olsem long ol bus ples ol pipel i save holim ol enimal long kaikai na long ol taun ol pipel i holim enimal long wokim bisnis.

Na em i tok ol pipel i mas save olsem salim ol enimal i soim planti samting olsem ol i dai taim ol kesim na ol no lukautim ol gut.



Ombudsmen Komisen bilong Papua Niugini

Lukluk long ol lo bilong Komisen

Pablik Tok Save

Ombudsmen Komisen i toksave long general public olsem em i wok long givim out wanpla Diskasen Pepa long kisim tingting bilong ol manmeri long ol lo em i bihainim long mekim wok bilong en.

Dispela pepa i kam wantaim ol askim long halivim Komisen long mekim gut wok bilong en. Ol tingting bilong yu long dispela pepa bai halivim Komisen long mekim senis long ol lo bilong en.

Yu ken kam long hed ofis bilong mipela long Deloitte Tower, Port Moresby o long ol regional ofis bilong mipela long Mt Hagen, Lae na Kokopo long kisim Diskasen Pepa.

Ol manmeri i laik givim tingting bilong ol i ken rait i kam long:

Ombudsman Commission PNG

P.O Box 1831

PORT MORESBY

NCD

O salim email i kam long legreview@ombudsman.gov.pg

Dedlain bilong dispela em 30/01/2015. Long kisim moa toksave ringim Legislative Review Coordinator long 308 2635 or 308 2600.

Authorised by:

Joseph Molita

Secretary to the Commission

Ol skul pikinini bilong PNG bai kisim moa trening long pilai Ragbi

Joylyne Karato UPNG sumatin i raitim

TUPELA NRL Gem Developmen Opisa bilong Australia i kam long Papua Niugini long givim wanpela skul long skul pikinini husat i gat 6-pela kris-mas long pilai ragbi aninit long program Lig bilong Laif.

Kate Parkinson na Damien Kennedy bai stap 12-pela

mun long PNG we ol bai skulim ol 9s bilong NRL long Port Mosbi we ol gem developmen opisa bilong wan wan rijon olsem Goroka na Kokopo bai kam long hia long kisim trening.

Kate Parkinson i tok em i namba wantaim bilong em long kam long PNG na lainim ol meri husat bai go pas long lainim ol skul pikinini.

“Mi amamas long wokim dispela wok we mi lukim olsem planti meri i no save pilai ragbi long hia na ol meri ting olsem dispela em I wanpela gem bilong ol man.” Pakinson i tok.

Mark Mom, Jeneral Menesa bilong PNG-NRL i tok olsem Australia gavman i sponsa long dispela program we ol bai lainim ol pikinini long

gudpela wok bilong NRL long rot we ol i ken pasim bal na rot long kik na kisim takol na skulim ol long wanem ol nupela rul ol Australia i kamapim.

Wanpela astingting bilong dispela program tu bilong sapatim ol skul pikinini long Praimeri level long kisim gudpela edukesen long 4-pela rijon ol i makim olsem, NCD,

Is Nu Briten, Isten Hailans na Bogenvil.

Mista Mom i tok olsem ol tu I makim ol meri long kamap developmen opisa we ol mas luksave long talen bilong ol meri long kantri.

Em i tok olsem ol dispela pikinini tu bai kisim skul we ol bai amamas long rot bilong ol yet long mekim ol I amamas. “Long karim aut dispela pro-

gram, mipela bai putim edvatismen long kisim ol man-meri husat save pilai long ol bikpela gems olsem PNG Hunters, Kumul na Digicel Kap long aplai long kisim trening long lainim ol skul pikinini,” Mista Mom i tok.

Long dispela program ol i nidim planti meri long kamap opisa long wan wan rijon long lainim ol skul insait long kantri.

Digicel Supa Nain Tonamen bai stat klostu

Joylyne Karato UPNG sumatin i raitim

DIGICEL i givim mani mak olsem K40, 000 long sapatim na mekim kamap bikpela Ragbi Futbol Lig insait long Papua Niugini.

Siaman bilong Papua Niugini Ragbi Futbol Lig (PNGRFL) Sandis Tsaka, i tokim ol nius lain olsem em i laik kamapim op isen kompetisen long kirapim tingting bilong pilai supa 9 gem.

Digicel em i wanpela bikpela sponsa bilong spot insait long PNG olsem Digicel Kap, PNG SP Hunters na tim kumul, na nau ol i amamas long sponsa long nains.

Digicel hetman bilong Konsuma, Khattar Fehmi, i

tok ol i amamas tru long sapatim dispela nupela gem we bai givim bikpela helpim long ol pilaia i ken lainim gut ol rul bilong ragbi nains.

“Yumi lukim nau olsem ragbi em i wanpela namba wan gem we ol manmeri long PNG i save bihainim gut. Dispela kain helpim bilong Digicel bai helpim ol provins long luksave na strongim talen bilong ol pilaia,” Fehmi i tok.

Dispela Digicel Supa Nains tonamen bai strongim intres bilong ol pilaia long pilai nains, na tu, bai opim rot bilong ol pilaia long pilai long SP Hunters na Digicel Kap.

Long Februari 14-15, Digicel Supa Nains bai opim gem bilong ol wantaim Sauten Konfederet long

Gabagaba long Sentral provins.

Gem bilong Hailans bai kamap long Maun Hagen long wankain mun long 21 i go 22, na Noten Lek long Madang long 22 i go long 29. Ol tim bilong Niugini Ailan rijon bai pilai long Kimbe long 7 na 8 Mas.

Tupela wina tim bilong dispela foapela salens bai i kamap long Lae long namba 14 na 15 Mas.

Dispela Nains Tonamen em i gudpela gem we bai inap long helpim ol pilaia long kisim bikpela luksave wantaim ol narapela Pasifik kantri.

Tim husat i gat laik long givim nem na laik kisim moa toksave i ken ringim Tonamen Dairekta, David Silovo, long fon namba 70506954.



Bos man bilong Digicel Konsuma, Khatta Fehmi, i sainim kontrak wantaim Siaman bilong PNGRFL, Sandis Tsaka.

K20, 000 bai go long husat i winim gol medal

GAVMAN bilong Papua Niugini i makim mani mak olsem K5.7 milien long givim long ol spot manmeri na tim bilong Papua Niugini husat i winim gol medal long Pasifik Gems.

Minista bilong Spot, Justin Tkatchenko, i tok olsem olgeta spot husat i winim gol medal bai kisim K20,000.

Em i tok olsem gavman i kamap wantaim dispela agrimen bikos ol i luksave long hatwok bilong ol spot manmeri na tim long givim taim bilong ol long makim kantri.

Mausman bilong tim PNG long Pasifik Gems, Richard Kassman, i amamas tru long dispela agrimen gavman i kamapim.

Mista Kassman i tok planti ol spot manmeri i save putim skul na wok bilong ol bihain na makim kantri long pilai.

Tura raun long Tatana

LONG las wiken, ol manmeri bilong ples Tatana long Nesenel Kapital Distrik (NCD) i bin amamas tru long lukim opisal maskot bilong Pasifik Gems, Tura Kokomo.

Tura i bin raun i go long hap wantaim Sif Eksekutiv Opisa (CEO) bilong Gems Ogenaising Komiti (GOC), Peter Stewart.

Dispela raun i bin kamap bihain long ol lida bilong Tatana i singaut long ol bikos ol i gat bikpela laik long givim helpim.

Raun bilong Tura wantaim ol opisal bilong GOC i bin lukim ol volibal salens, ol manmeri husat i go pas na pilai long dispela volibal salens i tok olsem Tura i bin mekim kala long dispela volibal salens bilong ol.

Ol kaunsila bilong ples Tatana, Opao Udia na Tom Linken, i bin makim maus bilong ol pipel bilong Tatana komyuniti na tok ol i gat bikpela laik long givim pasin welkam long ol manmeri bilong ol kantri bilong Pasifik.

Ol i tok ol bai givim helpim long sait bilong givim kaikai, soim pasin kalsa, na moa yet, soim gudpela pasin.

Ol i tok olsem ples Tatana i gat histori long soim gudpela

pasin long ol manmeri bilong ol arapela kantri long Pasifik, na ol i laik strongim dispela pasin we ol i bin mekim long ol Pasifik seremoni we i kam i go pinis.

Mista Udia i tok long 1980 Festival ov Ats, ol i bin go pas long stretim belo kaikai bilong ol manmeri bilong Fiji na Wallis na Futuna.

Long 1991 Pacific Gems, ol i bin go pas long stretim kaikai bilong Vanuatu na Kiribati, na long las yia long namba faiv Melanesian Festival ov Ats na Kalsa, ol i bin stretim kaikai bilong ol Nu Kaledonia.

Long dispela taim tu, Mista Stewart i tok amamas long ol ples bilong Motu Koita husat i save kamap wantaim planti ol gudpela volibal pilaia, na tu, soim gudpela pasin.

Mista Stewart i tok moa olsem planti ol memba bilong PNG volibal tim husat i bin go pilai long Mini-Pasifik Gems long Wallis na Futuna i bin gat planti ol pilaia bilong Motu-Koita.

Em i bin givim bikpela tok amamas tu long Leit Tommy Lui Kila bilong Motu Koita husat i bin soim bikpela komitmen long developim volibal long kantri.

POM Diwai bai salens long Ipatas Kap

Esther Bralyn Wani UPNG sumatin i raitim

POM Diwai em wanpela nupela tim we bai pilai long Ipatas Kap long Februari 7 na 8. Long dispela wiken long Sarere 24, ol bai pilaim wanpela trail gem bilong ol long Kone Tigers ples bilong pilai.

Ol pilaia bilong POM Diwai i wok long trening yet long pilai insait long Sauten rijon salens bilong Ipatas Kap.

Kosa na treina bilong ol, Bosky Koke, i tok ol bai salensim 16-pela tim long dispela Sauntan rijon salens bilong Ipatas Kap.

Mista Koke i tok long dro, ol i tok olsem wina bilong olgeta gem long raun robin bai kisim golden pas na go pilai fainel long Lae o wanem hap ol i putim long dro.

Em i tok ol i wok long trening strong bikos ol i gat bikpela laik long winim golden pas.

Em i tok moa olsem sapos ol i winim ol raun robin gem long Sauten rijon salens, ol bai gat bikpela salens long winim golden pas na resis long winim Ipatas Kap.

Mista Koke i tok long taim ol i sotim dro, bai gat 7-pela tim long wanpela pul, na bai gat tupela pul.

“Wanem tim i stap long namba wan ples bai go pilai long fainels. Raun robin salens bai no gat semi-fainel nabaut,” Mista Koke i tok.



Ol Pom Diwai i trening long Kone Tiger Fil.

i kam long bek pes

PNG bai pilai nains long Australia

Em i tok PNGRFL wantaim ol arapela spot oge-naisesen na ol sponsa i wok hat tru long kamapim strongpela skwat. Em i tok ol i laikim ol pilai husat i gat gutpela ek-spiriens na skil bikos astingting bilong ol em long lukim PNG i kisim gol.

Planti ol pilai husat i stap insait long dispela skwat em ol pilai husat i bin stap long ragbi lig nains tim bilong PNG we i bin go pilai long Glasgow Nains Tonamen long las yia.

Mista Tsaka i tok ol dispela pilai husat i bin go pilai long Glasgow i no bin lus long olgeta gem bilong ol, na ol i bin soim olsem ol i ken karim gut nem bilong dispela kantri long intenesenel level.

Em i tok moa olsem dispela tonamen bai helpim ol long developmen bilong ol, long wanem, ol bai salensim sampela ol strongpela tim, na tu, dispela tonamen em wanpela bikpela tonamen bihain tasol long NRL Auckland Nains.

Planti bilong ol dispela pilai em ol yangpela mangi. Mista Tsaka i tok olsem ol i laik givim dispela sans long ol yangpela bikos ol i gat bilip olsem ol dispela yangpela pilai i ken givim gutpela traime long ol arapela pilai bilong ovasis husat bai pilai long dispela tonamen.

Mista Tsaka i tok sampela ol pilai bilong tim i stap pinis long PNG Hunters skwat, na sapos ol i pilai gut, ol i ken strongim dispela posisen bilong ol long PNG Hunters.

Long taim bilong pilai, tim bai stap long lukut bilong Penrith Panthers Klap, long wanem, PNGRFL i kamapim wanpela gutpela wok pren pinis wantaim dispela klap.

Mista Tsaka i tok bikpela tenk yu na amamas i go long Jenerel Menesa bilong Panthers, Phil Gould.

Tim bai lusim PNG long namba 25 de bilong dispela mun long go long hap long redi gut na trening wantaim ol gutpela fasiliti bilong ol Panthers.

Stanton Albert husat i kisim tupela yia kontrak wantaim Panthers bai stap insait long dispela PNG skwat tu.

Tim; Stanton Albert, Philemon Kimisive, Ben Hetra, Samuel Koim, Watson Boas, Clement Kilengit, Rex Yalon, Gahuna Silas, Nickson Borana, Dickson Amea, Anderson Benford, John Ragi, Joel Kapia Kee, Ereman Ken, Mafu Kalas.

Kosa bilong ol Kumul, Mal Meninga bai stap olsem kosa bilong dispela tim na Stanley Hondina bai stap olsem Asisten Kosa.



RAIDERS NAMONA: Ol pilai na sapota bilong Raiders Namona bihain long pilai bilong ol long Hohola op sisen ragbi lig. *Ol poto Isaac Liri, Nicky Bernard na Esther Wani*



TURA: Tura Kokomo i amamas wantaim ol pikinini bilong Tatana long Nesenel Kapital Distrik (NCD).



GORDON TALLIS: Biknem ragbi pilai bilong bipo, Gordon Tallis i sekan wantaim wanpela sekyuriti long Visen Siti long Pot Mosbi.



LAPWING TIGERS: Ol mangi bilong Lapwing Drive long Gordons long Pot Mosbi i redi long pilai long tas ragbi kompetisen long Gordons.



RAGBI NAINS: Siaman bilong Papua Niugini Ragbi Futbol Lig, Sandis Tsaka i sekan wantaim Konsuma bos bilong Digicel, Khatta Fehmi, bihain long tupela i sainim agrimen bilong Digicel Supa Nains.

OI PNG etlit long USA i redi long Pasifik Gems

PAPUA Niugini Etlitiks Yunien (PNGAU) i tokaut olsem ol etlitiks manmeri bilong Papua Niugini long Yunaitet Stets ov Amerika (USA) i wok long kisim ol nupela rekot na i redi long soim kala long taim bilong Pasifik Gems long Julai.

Ol PNG etlit i bin statim 2015 indo trek na fil sisen bilong ol long namba 10 de bilong dispela mun long Yunivesiti ov Minnesota. Rellie Kaputin i bin brukim olpela rekot bilong em long hai jamp na long jamp. Pas-

taim rekot bilong em i bin stap olsem 1.65 mita long hai jamp na 5.47 mita long long jamp. Nupela rekot bilong em nau em 1.76 mita long hai jamp na 5.59 mita long long jamp. Adrine Monagi tu i soim sampela bikpela impruvmen

long hai jamp, long jamp na 60 mita hedols. Em i mekim 1.57 mita long hai jamp na 5.38 mita long long jamp. Long spot bilong tromoi hama, Sharon Toaka i brukim rekot bilong em long las yia wantaim nupela rekot, 11.02

mita. Ol arapela etlit husat i stap long USA na wok redi em John Rivan, Sharon Kwarula, Cecilia Kumalalamene, Shirley Vunatup, Kevin Kapmatana, Poro Gahekave na Andipas Georasi.

IMPROVED TASTE! Niupela teist wantaim planti mit na oil. Teistim na bai yu laikim moa yet.

DIANA

Tuna

Emi tuna
bilong PNG



Moa mit na
oil insait



Manufactured by



RD Tuna Canners Ltd.



TUNA IN OIL

PNG bai pilai long nains tonamen long Australia



GORDON TALLIS LONG PNG: Biknem ragbi lig pilaia bilong Queensland Maroons na Brisbane Broncos i bin raun long Visen Siti long Pot Mosbi. Ol manmeri husat i bin stap long hap i bin kirap nogut na amamas long kisim poto na toktok wantaim em. Digicel i go pas long raun bilong dispela biknem man. Poto Isaac Liri.

Isaac Liri i raitim

SIAMAN bilong Papua Niugini Ragbi Futbal Lig (PNGRFL), Sandis Tsaka, i tokaut long dispela wik olsem bai gat wanpela tim bilong PNG go pilai long Cabramatta Nains tonamen long Sydney, Australia. Dispela pilai bai kamap long namba 31 de bilong dispela mun.

Ol lain husat i go pas long stap olsem spona bilong dispela PNG tim em Papua Niugini Olimpik Komiti (PNGOC) aninit long bikpela program bilong ol, Go For Gold.

Mista Tsaka i amamas long sapot bilong PNGOC

na i tok olsem dispela tonamen bai givim sampela gutpela ekspiens long ol pilaia na helpim ol long redi gut long Pasifik Gems.

Mista Tsaka i tok PNGRFL i mekim bikpela wok tru long las yia long luk-save long ol ragbi lig pilaia long ol program we ol i bin kamapim, na tu, long Digicel Kap.

Em i tok dispela skwat we bai go long Australia em i no fainel nesenel skwat. Dispela skwat em i gat ol pilaia we PNGRFL i ting olsem ol i gat gutpela sans long makim kantri long taim bilong Pasifik Gems.

Moa long Pes 31.

Featured Products

- *Treated Mosquito Nets Prevents Malaria
- * Visitect Tests for Malaria
- * Arterakine Tablets Treat Malaria (artemether & piperazine phosphate)

Good Products, Better Prices, ikam long.



Johnstons Pharmacies Ltd

Phone 325 3185 Fax 325 0190 Email sales@johnstons.com.pg